

HOBANENG KE LE KHAHLANO

LE BORAPELI BO HLOPHILOENG



Kea u leboha, Moena Neville.

Le ka lula fatše. Pele, ke ne ke le maphathe kajeno ke bile ke fositse mehala e meng ea bakuli. Batho ba teng ba neng ba emetse ho rapelloa ka ho khetheha, ke tlamehile ho kopana le bona. Empa joale tse ling . . . moifo o mong, kea kholoa Billy o itse ba tsoa Canada, libaka tse peli kapa tse tharō. Joale, ba kena mona, lea tseba, ba lula lihoteleng le limoteleng ka linako tsohle. 'Me ke tloha ho ea kopana le bona, ho kopana le bona le ho ba rapella ba tsoa hohle lefatšeng, le Asia, Yuropa le hohle. Letsatsi ka leng, ha re le mona, ho na le batho ba kenang. Ba letotong ba feta makholo a tšeleta, ba emetse lipotsisiso tsa sephiri, ho batla ho le thata. Empa batho ba kulang haholo ba maemo a tšohanyetso ba batlang ho rapelloa, khele, ke leka ho ikopanya le bona.

2 Feela, be, ho tloha ke kopane le lekhotla la teraseti kahare ka mono, kopanong ea ka le lekhotla la literaseti mona kerekeng, re ile ra tlameha ho kopana nakoana e fetileng. 'Me nakong eo ke sitisitsoe ka nako e batlileng ho ba hora le halofo, 'me batho ba teng ba neng ba tlamehile ho fihla mona ho rapelloa nakong eo. Ha ba le teng mona, ke rata ho ba rapella nakong ena. Ka hona, ka kopo hleng, batho bao ba neng ba tlameha ho rapelloa, be, ha ba ka nyoloha joale nakong eo seletsi sa piano, e ka bang mang, ea tla tla 'me—'me a re fe lehlasonyana la "Ngaka e khōlō e haufi joale, Jesu ea lereko." Joale bao ba tla rapelloa, ha ba khona, ha ke tsebe hore ba ne ba le bakae. 'Me ke lōna baena bao, kea kholoa. Baena, ke sotlehile haholo 'meleng oa ka. Jesu o ne a jere 'meleng oa Hae, matšoenyeho, hore E tle e be 'Muelli ea tšoanelehang, hobane erekha E le Molimo o ne a entsoe nama hore A utloisoe bohloko. O khonne ho utloa mahlaba a mahlomola. 'Me ke ka baka leo A tlileng ho etsa phek. 'Me lebakeng lena O laetse Kereke ea Ha ho ntšeletsa mosebetsi oa Hae.

3 'Me ke na—ke na le hlompho e khōlō bongakeng ba meriana, sajeri le ntho tse joalo, bao—bao Molimo o ba fileng litalenta ho etsa lintho tse itseng 'meleng, ho seha le ho ntša leino le lebe, le lintho tse joalo. Kea e ananela. Empa ka linako tse ling li hlola tsebo ea bona—bona, ha ba—ba tsebe seo ba ka se etsang. Lea bona? 'Me kea kholoa, ke hona, re na le tokelo e tletseng, ka tloaelo ea rōna, haeba re bone ngaka ea lelapa, mohlomong ngaka e tsoile naheng, ngaka e itseng ea khale e lokileng e jarang lebone e parola tšimo bosiu, ho u fihlela, ho u alafa. 'Me haeba

a hloleha ho tseba, o tla ea bona motho ea holingoana ho eèna. U tla u romela ho sepeshelisi. 'Me haeba sepeshelisi se sa tsebe, ke—ke a thaba ha re ena le mohloli o mong, Ngaka e khòlō.

⁴ 'Me ha A hlolehe, Enoa eèna che, hobane Ke 'Mopi ka Sebele. 'Me O re etselitse tsela. Joale, hola ke ruile matla a ho folisa, nka—nka ea mono ka e etsa. Nka—nka thabela ho etsa joalo. Empa, matla a pholiso, ha ke na ona, ha ho motho ea nang le matla a pholiso. Empa re laetsoe, lea bona, ke Kreste, ho rapella bakuli, O noketse liphositi tsa matla a folisang. Lea bona? 'Me re mpa re tla feela, ka mokhoa oo, ho ngola cheke holima eona. "Sohle seo le se kopang Ntate ka Lebitso la Ka," ke cheke e sa ngoloang, "sohle seo le se kopang Ntate ka Lebitso la Ka, Ke tla se etsa." Ke tsepiso e kakang! E ke ke ea hloleha feela. 'Me ke thusitse baena besō le likhaitseli, lefatše ka bophara, ho etsa lipholisiti tsena... kapa ho hula linoutšu tsena Sesiung sa Molimo, ka Mali a Jesu Kreste. 'Me ebile katileho e khòlō. Esale A patala, hobane liphositi li se li kentsoe mono, u a bona. "O—O—O ne a hlabeloe littolo tsa rōna, re ne re foliose ka maqeba a Hae." Lea bona, ho se ho felile. 'Me re thabetse tumelo ea lōna bosius bona.

⁵ Ke kholoa Billy a mpooleletse ka moena ea tsoang hole koana Canada kapa nqa e 'ngoe. 'Me na ebe ho joalo? Ke uena moena ea tsoang Canada? 'Me—'me ebe u tsoa kae, moena? [Moena eo o re, "Leboea ho Fort Wayne, koana Kendallville."—Mong.] Kendallville, Indiana, ho tsoa Fort Wayne. Ke chetetse Fort Wayne. Ke sa hopola hantle. Ka tsoara likopano tse ngata mono Redigar Tabernacle. Kea kholoa le tseba moo e leng teng. 'Me ke sa hopola, ke sa le moshanyana, ke lutse maotong a Paul Rader, kahara Redigar Tabernacle, ke sa le moreri oa moithutoana. Ke monna e moholo, Moena Paul ee, le Moena Redigar hape, e le banna ba tumelo. Meea ea bona e phomotse bosius bona. 'Me joale, ke ne ke le moshanyana, le joale ke sa leka ho ntšeletsa seo ba se siileng, seo Jesu a se sietseng Kereke ea Hae ho theoha joalo.

⁶ Joale, ka tumelo ea ka eohle, ke tlil'o le rapella. 'Me—'me ha ke tle ke tlatselaka. Le ka mohla ha re batle ho e atamela joalo. Che, ha se hantle. Rea tla, re lumela re re re tla fumana seo re se kopileng, lea bona, ho tseba hore Molimo o e tsepisitse. 'Me re tla ka kholiseho pelōng ea rōna e reng Kreste o tsepisitse, 'me lōna baena le lekile ho ala tumelo ea lōna aletareng, la etsa sohle seo le ka se khonang, bosius bona ke tlela ho ala ea ka 'moho le ea lōna. Lea bona?

⁷ 'Me, joale, re fumana aletare e khòlō e sarolotsoeng sepakapakeng se sephara, 'me Sehlabelo sa rōna se robalitsoe holima aletare eo, Mora oa Molimo. Lea bona? Ke Sehlabelo seo se fophang mali. Molimo a ke ke a se talima a sa Se hlomphe, lea bona, hoba Leo ke Lentsoe la Hae, "Enoa ke Mora oa Ka ea ratoang, Mo utloeng."

⁸ Ke tlil'o kopa Moena Neville, moholo oa rōna, haeba a ka tsoela kapele le 'na re sa tsamaea. Ke batla kereke eohle . . . Hoja enoa e ne e le moena oa hao, monna oa hao, mora oa hao, ntate oa hao? Ke oa motho e mong, le hopole. Ha rōna, ka botsepehi bohle ba rōna, re atamele Molimo bakeng sa baena bana.

Ha re inamiseng lihlooho tsa rōna.

⁹ Ntate ea Maholimōng ea mohau, re tlisa ka pela Sefahleho sa Hao joale, ka pela aletare ea mohau, leha koana re eme ka pela seluloana sa patsi, ka mokhoa oo, mona lefatšeng, empa tumelo ea rōna e phahametse aletareng e khōlō eo e tukang koana, moo Jesu (Monko-monate pela Molimo, Sehlabeled sa Mali se tsoang Kalvari) Ea hlotseg maloetse afe, bohloko bofe, lefu, lihele, le lebitla, 'me a tsoha hape a nyolohela Leholidmōng, ho lula letsohong le letona la Boholo ba Hae. 'Me rōna, ka tumelo, rea tla, re inyollela mono ka mohau oa Molimo, ho bua holima aletare ena, ho 'Mopi oa Maholimō le lefatše, "Re amohele, Morena, re tla ka Lebitso la Morena Jesu."

¹⁰ Baena besō ke bana, 'me e mong oa bona o tsoa holima Fort Wayne koana, mona linaheng tsa koano, le e mong o tsoa hole koana Canada tlase mona, ho tlela nakoana e mahlonoko ena. Ke lipakeng tsa lefu le bophelo, Morena. Banna ba babeli ke bana, ba sa le bacha, tšebetso ea bona esale ngata ho Uena, Morena, masole a mabeli, Bakreste ba lumelang ho Uena. 'Me sera se phositse motsu, 'me motsu o chefō oo o hlabile 'mele oa bona nqa e 'ngoe, 'me ba khutlile, ba khutletse sepatala sa mohau oa Molimo, bakeng sa poelano, ho folisoa, ba tle ba boele ba kene lithekong hape, ba phahamisitse thebe, ho ikakhela ntoeng. Ba tlie ho itenya le rōna ka matla a thapelo, Morena. 'Me re tloha ho ea khahlana le sera.

¹¹ Ka Lebitso la Jesu Kreste, ba lokolle. Re u laela ka Lebitso la Jesu Kreste, ba tlohele.

¹² Ke bahlabani ba ntoa. 'Me, joaloka mohlanka oa Hao, ke tsoela kapele joale ho ba beha matsoho, ka tumelo, ke lumela hoo, "Mehlolo e tla tsamaea le ba lumelang ke eona ena," ho itsoalo ke Morena oa rōna, Mookameli oa Sehloho sa rōna ntoeng, "ha ba beha bakuli matsoho a bona, ba tla fola."

¹³ Sena ke se etsa ka Lebitso la Jesu Kreste. Matla a maloetse a tlamang 'mele oa moena enoa, a mo lokolle. Ka Lebitso la Jesu Kreste, a tsamaee.

¹⁴ Molimo o Matlaohle, 'Mopi oa Maholimō le lefatše, Moqali oa Bophelo bosafeleng, le Moabi oa neo efe le efe e molemo, theolela mahlohonolo a Hao holima bana bao re ba hlohonolofalitseng. Etsoe ho ngoliloe Mangolong, ho itsoe, "Ha u ka laela thaba ena, 'Sutha,' u sa belaеle pelōng ea hao, u mpa

u lumela seo u se boletseng hoba se tla etsoa, u ka fumana seo u se boletseng.” Kea lumela hore maloetse a bona a tlohetse ‘mele oa bona. Joale e builoe; joale e ke e etsoe. Amen.

¹⁵ Ka Lebitso la Morena Jesu kea lumela u lokolohile. Ka Lebitso la Jesu Kreste kea lumela hore u lokolohile. Amen.

Na ebe le eona kereke e lumela hona hoo? [Phutheho e re, “Amen.”—Mong.] Joale e ke e etsoe.

¹⁶ Joale, na ba teng ka mona ba ratang feela ho hopoloa thapelong, na u ka phahamisa letsoho la hao? Ho lokile, ha re Mo atameleng joale le sa behana matsoho holimo kantle mono. “Mehlolo e tla tsamaea le ba lumelang ke eona ena.”

¹⁷ Molimo o halalelang ka ho fetisisa, ka tumelo re bona Jesu, rea lumela hore O eme o teng joale. O baballa Lentsoe la Hae. ‘Me O itse, “Moo ba babeli kapa ba leng bararō ba kopane ka Lebitso la Ka, le ’na Ke hara bona.” Joale, Ntate oa Leholimō, matla a Molimo o Matlaohle a ame batho bana, Morena, ba sa ntse ba kopantse matsoho a bona, ba behane matsoho holimo. Thomo ea Hao ea ho qetela ho kereke, “Mehlolo e tla tsamaea le balumeli ke eona ena. Ha ba beha matsoho a bona holima bakuli, ba tla...ba ea fola.” U e tsepisitse, ‘me rea e lumela. Ka baka leo joale e entsoe, ‘me re U rorisa ka baka la eona, ka Lebitso la Jesu Kreste. Amen.

¹⁸ ‘Me ka Lebitso la Jesu Kreste matla a Molimo a tlotse lisakatuku tsena tse romelloang bakuli le bahloki. ‘Me ha li romeloa kantle ho behoa holima bakuli, ba tle ba fole. Re bala kahara Bibele moo ba nkileng ho Mohalaleli Pauluse, lisakatuku, liaporone; meea e sa hloekang ea tsoa bathong, le maloetse a fola. ‘Me, Ntate, rea itseba ha re Mohalaleli Pauluse, feela re U tseba u sa le Jesu. ‘Me re U kopa ho aba celo ena tlotlisong ea Hao. Amen.

¹⁹ Ha ke tsebe haeba ho na le...haeba liteipi li buletsoe, kapa che. Na li buletsoe? Haeba ho se joalo, ke batla hore ba li bulele nakong ena. Kea kholoa konopo e phahame. Joale, ke kholoa ke sa tl’o le khathatsa bosiusing bona. Ke qala halofo ea hora kapa metsotso e mashome a mararō a metso e mehlano pele. ‘Me joale, ke thuto ea sekolo sa Sontaha, ‘me ke hopotse ekaba molemo ho hatisa sena se lutseng pelōng ea ka. ‘Me re itokisetsa ho kena e—e lekhatheng le leng, tabernakeleng e ncha, e ncha ka botlalo.

²⁰ ‘Me joale ke rata ho bala Mangolo a ‘maloa. ‘Me lōna batho le ratang ho bala le ’na, ke batla ho bala ho Samuele oa Pele, khaolo ea 8, ‘me re batla ho qala ka temana ea 4 ho fihla ho ea 10; ‘me hape, ho boloka nako, ea 19 ho fihla ho ea 20. ‘Me ke tšoere maqephe a ‘maloa a Mangolo le liqotso tse ngotsoeng mona, tseo lōna batho ba tšoereng pene le pensile, kapa ho hong, pampiri, ao le ka ratang ho lebisa ho oona kapa ho a ngola, le ka a fumana, ho seng joalo, Mongh. Maguire o tla be a tšoere e—e—e teipi.

²¹ 'Me teipi ena ke batla ho e khethela bareri, baena besō, bareri ba nkuloisisitseng ka phoso, haholo baena ba likereke tsa bolumeli bo hlophiloeng. 'Me boholo ba tsona ke malumeli a hlophiloeng.

²² 'Me sehloho sa ka bosius bona ke: *Hobaneng Ke Le Khahlano Le Borapeli Bo Hlophiloeng*. 'Me joale ke tla bala bakeng sa motheo, kapa palo ea Lengolo, ho e tšetleha ka Lengolo e tiile, ke batla ho bala pele ho Samuele oa Pele 8:4-10, hape le ho 19-20. Letsöeleng la ka le bonoang, kea tšepa ha le khutlela lapeng le tla ngola Mangolo ana le a bale ka hlokomelo. 'Me ho baena ba tla mamela teipi, ke tšepa u sa tl'o koala teipi feels ha ho buua ntho eo mohlomong u sa lumelaneng le eona, empa u tla batla Molimo mabapi le eona, ho bona haeba e lumelana le Lengolo. Ke kholoa re tlamehile ho rōna le ho Molaetsa oa letsatsi.

²³ Ke kholoa likereke tsohle li tšoere Bakreste kahara tsona, 'me ruri ha ke bue khahlano le Bakreste. Empa lebaka leo ke entseng seo ke se entseng, le ho bua seo ke se buileng, ke ka baka la tšusumetso ea Moea o Halalelang holima Lentsoe.

²⁴ Joale ha re baleng ho Samuele oa Pele, khaolo ea 8, ho qala ka temana ea 4, le ho bala ea 10, 'moho, pele.

Ebile baholo bohole ba Iseraele ba phutheha, ba tla ho Samuele Rama,

'Me ba re ho eèna, U ka bona, u se u holile, 'me bara bara ba hao ha ba tsamaee...tsamaee ka tsela: joale re beeble morena a tle a re ahlolele joalokaha ho etsoa lichabeng tsohle.

Taba ena ea mpa ea soabisa Samuele, kamoo ba buang kateng ba reng, Re beeble morena hore a re ahlolele. 'Me Samuele a rapela MORENA.

MORENA a re ho Samuele, Mamela puo ea sechaba kahohle kamoo se buang le uena kateng: hobane ha ba lahle uena, ba lahla 'na, hore ke se ke 'na ka ba morena oa bona.

E ntse e le ho etsa ka tsohle tseo ba li entseng haesale ke ba ntša Egepeta ho tlisa tsatsing lena, ho mphuralla, le ho sebeletsa melimo eselete, le uena ba u etsa joalo.

Joale mamela lentsoe la bona: leha ho le joalo u ba nyatse, u ba bontše mokhoa oa morena ea tla renamolima bona.

Ebile Samuele o beela sechaba se kopileng morena ho eèna mantsoe ana ohle a MORENA.

²⁵ Joale temana ea 19 le ea 20 ho phethela.

Leha ho le joalo sechaba sa hana ho utloa lentsoe la Samuele; sa re, Che; empa re tla ba le morena ea re busang;

*Re tle re tšoane le lichaba tse ling; morena oa rōna a tle
a re ahlolele, a tsoe . . . etelle pele, a laole lintoa tsa rōna.*

²⁶ Morena a eketse mahlohonolo a Hae palong ea Mantsoe a Hae. Joale, joaloka tlelase ea sekolo sa Sontaha, ke rata hore re batla ho leka ho ela Lentsoe hloko kamoo—kamoo re ka khonang.

²⁷ 'Me rea tseba hore—hore ka linako tse ling ho buuo lintho, ('me le likereke tse ling), ebe li khopisa motho ea rutiloeng ka mokhoa osele ho seo ba seng . . . ba se utloang. Ho tea mohlala, monna o mpoleletse tsatsi le leng, e leng motsoalle oa ka ea lutseng a le teng joale, o itse, "Mohla u ne u bua, Moena Branham, leha koana ke bile le tumelo e kana ho uena, 'me ke lumela, mohla u ne u re 'ha ho lihele tsa Bosafeleng,'" ho re, "Ka batla ke oa setulong sa ka. 'Me ka re, 'Ruri monna eo o fositse.'" 'Me a boela a re, "Ua re emisa nako e telele. 'Me eaba u re, 'Sebopoho sa Bophelo Bosafeleng se seng feela, 'me bona bo tsoa ho Molimo.'" 'Me bohole rea bo batla, lea bona.

²⁸ 'Me ha ho Lengolo le reng lihele ke tsa Bosafeleng. Hobane, Bosafeleng ha bo na qalo, ebile ha bo na qetello. Ka baka leo Bibele e itse "lihele li bopetsoe liabolosi le mangeloai a hae," ha ho le joalo ha se tsa Bosafeleng. Li kile tsa ba sieo ka mohla o mong, 'me ho tla fihla mohla li sa tl'o hlola li eba teng, hape. Empa ba ka ahloloa kahare ka mono, ka mollo le sebabole, le ka mekoti ea mollo, ka nako e sa baloeng, empa qetellong e tla fèla hobane lihele ha se tsa Bosafeleng. 'Me haeba lihele e le tsa Bosafeleng, u tla tlameha ho ba le Bophelo Bosafeleng ho phela liheleng tsa Bosafeleng. 'Me haeba e ne e le tsa Bosafeleng, esale li le teng, 'me esale u le kahara lihele tsa 'me u tla lula kahara lihele kamehla. Lea bona, ka baka leo ha ho ntho e joalo.

²⁹ Ka baka leo, u a bona, *Bosafeleng* ke "ho sa bang le qalo kapa qetello." Ebile sebopoho sa Bophelo Bosafeleng se seng feela, 'me bo ka ho Molimo, bo tsoa lentsoeng la Segerike Zoe, le bolelang "Bophelo ba Molimo ka Sebele." 'Me ha re tsoetsoe labobeli ke Moea oa Molimo, re fetoha Bosafeleng le Molimo, kahobane re ruile karolo ea Bophelo ba Hae, hoo ho re fetola bara le barali ho Molimo, ke hona ha re ruile Bophelo Bosafeleng. 'Me Bophelo bo ahileng ka ho rōna, Molimo o tla boela o tsosa 'mele ka Bophelo letsatsing la ho qetela, empa Moea oa Molimo o ahileng ka rōna ke oona o re tsosang, hobane ke Moea oa Kreste o neng o ahile ka ho Kreste, ke oona o phelisang mebele ea rōna 'me o boela o re tsosa, le Eèna, ho lula koana—koana—koana Khanyeng le ho busa le Eèna.

³⁰ Joale sehloho sa ka, joale, esale lilemong tsena tsohle, 'me esale tabernakele ena e eme. Leha koana, ke tlotsitsoe kahara kereke ea Missionary Baptist, ke Ngaka Roy E. Davis, lilemo tse ka bang mashome a mararō a metso e merarō tse fetileng, mona Jeffersonville. Joale 'na, ho tloha mohlang oo, ke lutse nakoana

feela kahara mokhatlo, likhoeli tse 'maloa, eaba ho hlaha ntho e sa khemeng le lengolo e hlahisoang ke kereke, 'me ka mo bolella nke ke khema le eona. 'Me 'na ka baka leo, ehlile, ka koptjoa ho e etsa "ho seng joalo," eaba ke etsa ho seng joalo. 'Me esale ke lumela ntho e le 'ngoe, hore lena ke Lentsoe la Molimo. 'Me ka bolella monna e beng e le e—e mosuhe ea hloahloa, "Ha u ka ntšupisa eona kahara Lentsoe la Molimo!"

"Empa eona," a rialo, "ke thuto ea rōna eo."

Ka re, "Empa ke e batla e tsoa Lentsoeng, lea bona, Lentsoe la Molimo."

³¹ 'Me hase kahobane ke se setho sa mokhatlo haele moo esale ke eme khahlano le mokhatlo, hobane ke lebohela baena besō, bao ke buang le bona kajeno, bao ke memeloang ho bona, kea kholoa, bonnyane bolumeli bofe le bofe ba mokhatlo, haholo liemong tsa Evangelie Tletseng, esita le likereke tse ling tse ngata. Nkile ka koptjoa ho kenela lilekane tsa bona le ho ingolisa le bona, empa esale ke ikemetse ka bolokolohi. Hobane, tšoaetso ea ka, ha ke batle ho e tsetleha holima sehlopha se le seng sa batho. Ke batla seo Molimo o mphileng sona, ho rapella bakuli, se sebeletse bana bohle ba Molimo mokhatlong ofe le ofe. Ha A eso mpotse ho se rapele, kapa sebakeng sa enoa kahobane e le setho sa *Hore-le-hore*, Molimo o ahlola pelō ea motho.

³² 'Me joale, le ho qala, lebaka leo ke sa ingolisang le tsona 'me ke buile khahlano le tsona, eona, pele, ke kahobane ke sa lumele hore ho hlophisa Bokreste ho lumellana le Mangolo. Ke lumela hore ho hanana le mangolo. 'Me ke sona seo ke tla leka, bosiung bona, ho tsitlallela ka mohau oa Molimo, ho le kholisa hore se hanana le mangolo, ke tlolo ea molao ho bopa mokhatlo ofe.

³³ Joale, tabeng ea pele, re bo bitsa "borapeli," lentsoe *borapeli* ke "lesira," le bolela ho koahela ntho. Joale, Adama o kile a thea borapeli, empa a iketsetsa bona, ka mahlaku a feiga, 'me ha bo a ka ba sebetsa. Eaba o ithalla mohopolo oa hae 'me a leka ho ipetlela fera ea ho phonyoha, ho ithuela pholoso ka ntho ea boiqapelo ba hae, eaba Molimo o a e hana, ho qala ho Adama hofihlela tsamaisong ea ho qetela ea mokhatlo. Ha eso etsahale, 'me ka mohau oa Molimo kajeno re tla e paka ho haola le Bibele. Borapeli e ne e le lesira. Adama o iketselitse lesira ka mahlaku a feiga, ho iketsetsa, ka bo-eèna, ho leka ho iketsetsa ntho e itseng ka bo-eèna.

³⁴ Empa Molimo o batlie lefu, pheko. Joale, phapang e khôlô lipakeng tsa borapeli le pholoso, lea bona, pholoso. Borapeli ke lesira. Lea bona? Pholoso ke Tsoalo, neo ea Molimo. Pholoso ke Tsoalo, neo ea Molimo, 'me ke ke ea fumanoa ke motho ofe kapa ke sehlopha sa banna. Neo ena Molimo o e tlisetsa motho ka bomong. 'Me lineo tsena tsa Bophelo Bosafeleng li

ne li reroe ke Molimo ho fuoa motho mang le mang le pele re eba le lefatše, ho latela Mangolo. Bibele e buile, ho Tšenolo, ho thoe antikreste ea neng a tla tla lefatšeng, o tla thetsa bohole ba ahileng lefatšeng, bao mabitso a bona a sa kang a ngolao Bukeng ea Bophelo ea Konyana pele ho theoa lefatše. Lea bona? Molimo, ka boitsebelopele ba Hae, o bone ea tlang ho tla le ea sa tlóng ho tla, Kreste o theohile ho etsetsa ba tlang ho tla tsela. Lea bona, ho tseba ba bang.

³⁵ Haeba e le Molimo, le hona, O tlameha ho ba mohlokapeheletso. 'Me haeba E le mohlokapeheletso, E ke se be mohlokapeheletso e se eamatlaohle. E ke se be eamatlaohle e se motlalahohle. E ke se be motlalahohle e se motsebatsohle. Ka baka leo, u a bona, hoo hohle ho Mo etsa Molimo.

³⁶ Ka baka leo, O tsebile qetello esale qalong. O tsebile ea tlang ho khona le ea sa t'l'o khona, 'me O tsebile ba bangata ba tlang ho etsa hoo, eaba O romela Kreste ho etsetsa ba tlang ho tla pheko. Joale, seo re ka se etsang hase amane le eona ka letho. Jesu o itse, "Bohole bao Ntate a 'Neileng bona," a seng, ke lekhathe-le-fetile, "ba tla tla ho 'Na. 'Me ha ho ea ka tlang a sa huloa ke Ntate oa Ka pele." Lea bona? Joale, lea bona, ntho eohle e tsebjoa ke Molimo.

³⁷ U re, "Moena Branham, na ke kene kahare?" Ha ke tsebe. Kea tšepa joalo ka 'na. Re sebetsa pholoho ea rōna ka tšoho le ka thothomelo. Joale, Kereke e reriloepele ho kopana le Molimo e se na letheba kapa letsika. Joale, haeba re le kahara Kereke eo, re reriloepele 'moho le Kereke eo. Joale u itekole ka Lentsoe, joale ke moo re ka shebang hore na re hole hakakang.

³⁸ Joale, joale, Bokreste bo hlophiloeng ha bo khone ho u fa kholiso eo. Che. Ba bang ba bona ba re, "Nyoloha u pake hore Jesu ke Kreste 'me u kolobeletsoe kahara kereke." Diabolosi o etsa hona hoo. O a lumela, ka bo-eèna, hore Jesu ke Kreste, ebile o a thothotmela. Lea bona, ke hantle.

³⁹ Molimo ha o eso laele, nqa efe kahara Lengolo, hore ho tla hlaha mokhatlo nqa efe. Ha ho sebaka sa hoo kahara Bibele. Adama o kile a qala o mong eaba o a thisa.

⁴⁰ Eaba moo Nimrode a lekang ho bopa mokhatlo. Haeba u le ranalane, 'me u tseba histori ea Babilona, bala *Babilona Tse Peli* ka Hislop, u tla chabeloa ke leseli le leholo. Eèna, Nimrode, monna enoa oa sebe, o ile a hapa Babilona le likerekana tsa eona tsohle tsa letsoe, kapa libakana tse mabapi, etsoe e ne e le papiso ea—ea Bokreste ba bokoenehi ba letsatsi lena la morao, 'me a haha sebaka se seholo 'me bao kaofela ba bapala...ba lebisa tlota ho sona. 'Me ka mono a haha tora 'me a leka ho hlaphisa motho 'moho, empa ea hloleha. Taba eo e ile ea hloleha. Hoo ha hloleha.

⁴¹ Kore, ho Numere 16:1, ha u rata ho bala, Kore o lekile hona hoo. Ebile o phutha Balevi bohole 'moho, 'me a nka...

batlotlehi ba bang, monna ea phahameng, monna e moholo, monna ea halalelang, eèna le Dathane ba teana ba re, "Ha se tsoanelo, monna a le mong o leka ho re okamela." Eaba ba qala ba leka ho thea ba hlophisa mokhatlo, ba tla ema pela Moshe le Aarone, bao Molimo a ba khethetseng mosebetsi, ba ba bolella hore ba ikimetsa ka mosebetsi o ba sitang, ha thoe phutheho eohle e a halalela, 'me le bona ba na le tokelo ho . . ."Polokeho e teng bongateng," ehlide, ba rialo. Polelo eo ha e na sebaka Bokresteng. Mono ke ntoeng. Lemohang, phapang e khòlò haholo.

⁴² U nka qotsa Lengolo, 'me ua re, "Judase a tloha a iphanyeha" 'me "le uena u etse joalo," ha u batla, empa ha e lokise letho.

⁴³ Molimo o no o khethile Moshe 'me Molimo o no o khethile Aarone, 'me e le oona molaetsa oa letsatsi. 'Me ho sa tsotelehe na lehlakore le leng le bonahatse le lokile hakae, e ne e le khahlano le mohopoloo oa Molimo. 'Me eka khona mohopoloo oa Molimo ebe mohopoloo oa röna. "Mohopoloo o nong o ahile ka ho Kreste o be ka ho löna." 'Me Bibele ena e senola mohopoloo oa Kreste. 'Me Buka eohle ea Tšenolo, e bitsoang Apokalipse, ke Tšenolo ea Jesu Kreste. 'Me re bona kamoo A nyatsang ntho eo, kamoo A e qhelelang lehlakoreng le leng, 'me re tla kena ho eona kamora nakoana. Ke hantle.

⁴⁴ Kore, kea kholoa o ne a tsepahetse ketsong ea hae. Kea lumela hore monna eo o ne a sa—o ne a sa ikemisetsa ho etsa phoso. Kea lumela e ne e le booatla ba monna ea sa kang a bona khato ea letsoho la Molimo le ho tseba Mangolo, 'me ka baka leo a e thea holima mabaka feelsa.

⁴⁵ 'Me kajeno bothata boo bo batla bo etsa pheresente tse mashome a robong, re ntse re leka ho sotetsa monahano oa röna, lenaneong la Molimo. 'Me ha rea tlameha ho nahana, ho hang. Ke Eèna ea re nahanelang. Monahano oa röna re tlameha ho o tella thato ea Hae. Lea utloisia joale?

⁴⁶ Kore, ka boikemisetso bo bottle, a tloha a tsamaea ka thuto ea bohata, a ntse a bolella baena bana, 'me a ba pakela ka lebaka, ho re Molimo ha o a hlohonolofatsa Moshe a le mong feela, moporofeta, moromuo, le ho mo hlohonolofalitse a le mong feela, empa, "Phutheho eohle e ne e halalela," a re, "'me joale phutheho eohle e na le kabelo ketsong *ena*, 'me phutheho eohle e na le tokelo ho etsa *sane*." 'Me ba ena le monna ea lokileng, Balevi. Joale, ke eona khetho ea Molimo eo, kajeno re ba bitsa, "bareri," Molevi e ne e le mosebeletsi oa tempele. Na Moshe ha a ka a ba phepetsa? 'Me, mona, ha a e atamela un . . . ka ho hlomphollo. O ba laetse ho nka libano, ba tšeles mollo o halalelang teng, ba noke linonetso holima oona, 'me ba tsokotse linonetso tse halalelang tsena, etsoe e ne e le molao oa Molimo. 'Me eaba ba nyoloha ho beha kereke tlasa taolo ea sehlopha sa banna, athe Molimo o e laetse ho etsoa ke monna a le mong.

⁴⁷ 'Me, ha ba entse joalo, Moshe a itiha ka sefahleho sa hae kaha a tsebile mosebetsi oo a o laetsoe ke Molimo. 'Me Molimo o itse, "Ba laele ho tlisa libano tseo mona ka pela tabernakele." Eitseha ba qala ba tsokotsa libano tsa bona tse tukang mollo, 'me linonetso li fokaela, Molimo oa bua le Moshe le Aarone, "Le ikhethe hara bona! Tsoang hara bona!" Hobane, hamorao O ba bitsitse "baetsalibe, le ba sa lumeleng."

⁴⁸ 'Me sebe ke ho se lumele Lentsoe la Molimo. U utsoa hobane u sa lumele. U leshano hobane u sa lumele. U feba hobane u sa lumele. Hola u le molumeli, u ke ke ua etsa tse joalo. Likobo li peli feela, ke tumelo kapa ke ho se lumele, u laoloa ke ena kapa e 'ngoe.

⁴⁹ Joale, Molimo, tšimolohong, e ne e le Lentsoe, 'me O ne a etsoe nama a aha hara rōna. E ne e le Lentsoe, Ke Lentsoe! 'Me ha Molimo o ahile ka ho uena, ke Lentsoe la Molimo le ahileng ka ho uena, mono u ka thasisetsa ntho efe le efe eo A e buang ka "Amen." Ke Molimo o ahileng ka ho uena.

⁵⁰ Joale ha u ka elelloa, monna enoa ea se nang molato ea tšoereng libano letsohong la hae, mollo o halalelang letsohong la bona, Molimo o ile oa ahlamisa lefatše oa ba metsa, oa ba khetha ho Moshe kahobane Moshe a ikarotse ho bona. Ebile Moshe o lemosa phutheho, "Le se ke la kenella boootla ba sehlopha seo. Le ba sirohe!" Joale, le tseba Mangolo, balang ea 16, 17, ea 18, hape, khaolo, le tla e fumana. "Le ikanole ho baetsalibe bana, baetsalibe ba sa lumeleng. Tsoang ho bona, hobane ba habile tšenyeho, le sohle sa bona." 'Me eare ha ba... lefatše la theleha la hohlomela ka banna bana ba kokositseng mollo o halalelang ona. Batho ba se nang molato ba thetsitsoeng ke motho.

⁵¹ Le kajeno ho a tšoana! Banna ba bangata ba se nang molato ba tšoasoa lerabeng la moetlo, ba ntse ba tšoere Lentsoe le Halalelang letsohong la hae, 'me ba nahana hore ba rera ka Lona. Ke bone tsobotsi e ferella sefahlehong sa moreri lekhatheng leo, moreri oa Methodise, e ne e le moreri oa Methodise hofihlela bosiu ba Sontaha se tsoa feta. 'Me eitseha a sheba, kea kholoa e bolela tse ngata ho uena, moena, ho tsoela kantle.

⁵² Joale, lea bona, ba tšoere libano, mollo o futhang monko o monate pela Molimo, 'me matsoho ao a tšoere ntho eo, koana ba timetse ba tšoere libano letsohong la bona, kahobane ba lekile ho etsa ntho ka botšepehi, athe, e khahlano le Lentsoe la Molimo, ho leka ho bopa mokhatlo. Ha thoe, "U ikimetsa haholo. U mang uena u itlalehang u tšoere Lentsoe lohle la Molimo?"

⁵³ Ba sitiloe ho bona Moshe eo e—e neng e le moromuoaa oa hora eo. Lea bona, o ne a tšoere HO RIALO MORENA. Lefatšeng ho se ea joaloka eēna. O ne a tšoere Molaetsa, 'me batho ba sitiloe ho E bona. 'Me Moshe keha a tsepame le HO RIALO MORENA hantle. Ehlide. Ke hantle.

⁵⁴ Joale kajeno re fumana hona hoo, banna ba lokileng, banna ba baholo, banna ba khabane ba lekang ho rera Lentsoe la Molimo (letsohong la bona) ka moetlo o entsoeng ke motho. Ho khaola *mona*, le ho khaola tlase *mona*, ho e fetola *sena*, 'me "tloo u ingolise le kereke u fetole lengolo la botho ba hao," 'me ba shoa moeeng ba tšoere Lentsoe leo letsohong la bona! Lea bona?

⁵⁵ B sitiloe ho lumela moromuo oa Molimo kapa Molaetsa oa Hae oa letsatsi leo. Ha ba utloisisa hobaneng Molimo o moholo o sa sebetse le sehlopha sa batho, le ho e beha feela holima monna a le mong.

⁵⁶ Ke buile le ba bakae kajeno, "Re tla etsang, Moena Branham? Rea tseba hore u nèpile, empa ebe re ka etsang? Mokhatlo o tla re kharameletsa kantle, ha ho moo re ka eang teng." Ke ba utloela bohloko; empa Sebaka se teng. U re, "Be, re ka bolaoa ke tlala."

⁵⁷ Davida o itse, "Nkile ka ba ngoana, 'me joale ke holile, empa ha ke ea so bone ea lokileng a lahliloe, le peō ea hae e sikila bohobe."

⁵⁸ Le Jesu ba mo latotse tlasa motheo oo. Ba ne ba haretsoe ke bolumeli ba mokhatlo oa bona, le baprista ba halalelang le mehaho e halalelang, le likereke tse halalelang le litempele tse halalelang, ba sitiloe ho bona Molimo kahara tempele ea Hae ea motho. "Uena, u leng motho, u iketsa Molimo." Lea bona, keha ba thatetsoe ke eona haholo! Le banna banna keha ba rarahane ba re Dathane le bao ba nèpile. Nimrode keha rarahane hakana a ikhopola a ka sibolla ntho e ka phahamisetsang batho holima khalefo ea Molimo. Adama keha a ikholisitse haeba a ka koahela bofeela ba hae Molimo ha o na ho bo bona. U ke ke ua bo koahela, ke Molimo o lokelang ho bo koahela. Lea bona? Lea bona? Lenaneo la Molimo lea bo koahela, e seng la hao. Haesale ho lutse joalo, ba sitoa ho bona Jesu kahara tempele ea Hae, Molimo o bonahetseng nameng.

⁵⁹ Kajeno ke batla ke utloa bohloko ha ke bona Mantsoe a Bibele a khabetsoe hakana ke meetlo. 'Me batho ba pelo li tšepehileng ba ema mono ba utloa Lentsoe leo, 'me ba Le tseba e le 'Nete, empa ba mpe ba se leke ho nka khato, hobane moetlo oa bona o ba ruta ntho e fapaneng. Le ka hlatsoa lipitsa le lipane, he, baena, tsoelang pele. Empa haele rôna, 'na le ba ntlu ea ka, re khetha Kreste, Lentsoe. Lea bona?

⁶⁰ Ha re qotseng Johanne 3 nakoana, Nikodema, moholo le 'musisi oa bolumeli bo boholo bo bitsoang Sanhedrine. Keha ba ikopantse 'moho, 'me ba thea meetlo ea bona. O-o mong oa Bafarasi le o mong oa Basadusi, 'me mohlang oo keha ba bopile mokhatlo oa bona oa bolumeli, ka liphapang tsa bona, 'me ka hoba ba....Monna enoa e le moholo, 'musisi oa Sanhedrine e khôlô ena, monna ea hloahloa thutong. A tseba

Mangolo, kamoo a hopotseng. A e tseba ka moetlo oa bona. Na Jesu ha a bua, “Lōna le tšoere, ka moetlo oa lōna, le fetotse Melao ea Molimo ntho e se nang matla”?

⁶¹ Lea bona, ka baka la meetlo ea bona! Hoo ke'ng? Ke ho itlhalosetsa Lentsoe, sebakeng sa ho Le tlohela, seo Le se buang. Ba re ha le bolele Sena. Na le lemohile, diabolosi o sebelisitse puo eona eo ho Eva, ho thea mokhatlo oa pele, lea bona. “Ruri ho tla ba *tjena*. Molimo a ke ke a etsa hoo, u a tseba.” Lea bona, e a itšoanelia. Le kajeno e a itšoanelia.

⁶² Joale re elelloa 'musisi enoa a tlie ho Jesu. Ntho ea pele, joale, o tlie a batla Bophelo Bosafeleng, o tlie a batla pholoso. Koana, monna oa seemo sa hae, moholo Iseraeleng, empa moholo oa Iseraele o tlie ho Monna eo re sa tšoarang le rekoto ea letsatsi feela kahara sekolo. Monna ea holileng a se a tsofetse, moprista oa khale, mohale, o tlie ho Thaka le lecha. E ne e le motlotlehi, monna oa morui o tlie ho Mokopi ea se nang moo a samelang hlooho ea Hae teng, ho Mo botsa ka tsela ea pholoso le ka Bophelo. Tabeng ea pele, bao ba Sanhdrine, le Nikodema o pakile, ba bone ka ho Jesu seo banna ba bang mokhatlong oa bona ba se hlokileng. Ba bone se seng ka ho Eèna, hobane o itse, “Rabbi, rōna rea U tseba.” “Rōna,” yaa, keha ba sa batle ho e paka, kaha ba ka raheloa kantle. Lea bona? “Rea tseba U Moruti ea tsoang ho Molimo, hoba ha ho motho e aka etsang lintho tsena tseo U li etsang Molimo a se ho eèna. Re tseba seo!” Oh, khili! Mokhatlo!

⁶³ Joale, re lemoha hoba Jesu e ne e le ponahatso ea Molimo. Joale, “Ha ho motho ea ka etsang lintho tsena Molimo a se ho eèna.” Ba tsebile ntho e fapaneng kahara Monna eo. E ne e le Leseli la letsatsi leo. E ne e le Paki ea Molimo.

⁶⁴ Le Kore o e bone hona hoo kahara Moshe. Letsatsing leo ba ne ba se na monna ea kang Moshe. E ne e le paki ea Molimo e Mokhethoa, ea letsatsi leo, matleng a Molimo. Kore le sehlopha sa hae ba e bone kahara Moshe. Ba utloisisitse e ke ke ea eba Moshe; Moshe a ke ke a phetla Leoatle le Lefubelu, Moshe a ke ke a romela likoluoa holima lefatše. E ne e le Molimo kahara Moshe, 'me, kahobane Molimo a Itlhahisitse ka paki kapa ka leseli la letsatsi, ba sitiloe ho E bona. Kore keha a batlide ho hlophisa sehlopha sohle sa banna, ho kenya eng le eng.

⁶⁵ Mokhatlo o khabane nqa eo, ho sunya nyee eohle e leng teng, 'me ba e bitsa “Bokreste.” Ho isa moshanyana sekolong athe ha a tsebe letho ka Molimo ha kaa ka Mokhothu a sa tsebe letho ka bosiu ba Egepeta, ho mo isa koo ba mo foqa thuto 'me ba mo rute saekoloji, ba mo apese Ph.D., le garata ea bongaka kapa bachulara ea botsebi, kapa ntho e kang eo. Ebe ba mo roma ho ea bolela Evangelii, a bile a eso pholosoe, a hana tsoalo ea moroetsana le tsobo, a hana pholiso ea Khalalelo, a hana Matla a Molimo, a hana eona metheo eo Jesu a e shoetseng,

ho hana Mareka 16 ho thoe ha ea bululeloa, ho hana “mehlolo e tla tsamaea le ba lumelang ke eona ena” athe Jesu o buile Mantsoe ao ka sebele sa Hae, ho hana Liketso 2:38, ho hana Mangolo a mang ohle a tlileng ka pululelo. Le ho leka ho amohela moetlo oa motho athe ha ba tsebe letho ka eèna, ’me ba o tsitallela. ’Me ha u ba bolella ’Nete ’me u ba bontša ’Nete, ba lihlong ho nka khato, ka baka la mokhatlo oa bona.

⁶⁶ Kore o entse hona hoo. O bone Molimo kahara Moshe. O bone Agente ea Molimo e sebetsa ka eèna. Le Nikodema o bone Molimo ka ho Kreste, “Ha ho motho ea ka etsang tsena Molimo a se ho eèna.” Nikodema o ne a se a kene kahara mokhatlo, a leka ho tsoa. Kore a le kantle, a leka ho etsa o mong ho kena kahara ona. E ne e le phapang. Nikodema o ne a leka ho fumana pholoho, ho tsoa nthong eo; a le kahara eona ho tloha esale moshanyana, a se a khathetse ke eona. A batla ho bolokeha. Empa Kore o ne a leka ho ikahela e—e sebaka moo e ka bang ntho ea tonana.

⁶⁷ Le batho ba joalo kajeno. Ke bona bothata ka Bokreste, re fumana khahlakhahla ea boetsisi ba bohata. ’Me batho ba rôna ba Pentekosta, t oarelang tlahiso ena, e bohlasoa ka eona, boipapiso ba nama! E re Molimo a hlahise motho a mo nehe lethonyana, ’me mang le mang naheng o tla leka ho etsisa motho eo. Na ha le elelloe hobane le bolaisa sehlopha sa lona? Ha le bapala bolo ea maoto... “Me mohau,” kamoo Pauluse a ka beng a e buile, “re mathe lephallong lena ka tiisetso.” Monna ea t oereng Bolo, se lekeng ho e phamoola matsohong a hae, lekang ho mo sireletsa. Empa bakeng sa hoo, erekaha e se leloko la mokhatlo oa lôna, le leka ho mo amoha Eona. Monna ea itseng ea temekang, a ke ke a khona, a ka khoptjoa le ke palesa e hlonngoeng kapeiting, ebe o leka ho u amoha Eona. Ke hantle. Joale, re bua moeeng, ke rialo. Le nt oarele, ke... Be, o khoptjoa ke nthoana e kang Liketso 2:38, ehlide o tla oa. Haeba a khoptjoa ke Mareka 16, ebe o tla phomella joang? Lea bona? Tsona lithuto tsa Kreste tsa sehlooho. Ebile eona ntho eo ho rerisanoeng ka eona Lekhotleng la Nicaea, e sa ntse e ba khopa ka mora lilemo tsena tsohle.

⁶⁸ Boit eko, Kore o ne a leke ho bopa mokhatlo, ho kena ho oona. ’Me haesale Nikodema a le kahara oona, o ne a leka ho tsoa ho oona. Nikodema o ile a amoheloa, ’me a tsoa. Kore o timetse kahara oona, boit ekong ba hae, o timetse khabareng ea boit eko ba hae. Oh, khili!

⁶⁹ Mokhatlo oo Nikodema a neng a o kenetse, o tsebile hoba Kreste o romiloe ke Molimo, ho itsoalo. Nikodema, khaolong ea 3 mona, o a e paka, “Rabbi, rea tseba U Moruti ea tsoang ho Molimo, hoba ha ho mang ea ka etsang mehlolo ena U e etsang Molimo a se ho eèna.” ’Me sona sehlopha seo, ka baka la mokhatlo oa bona, ba Mo bitsitse “Belsebule,” ka baka la matla a Hae a lelekang batemona, ’me ha thoe, “O thetsa batho ba rôna ka Thuto ea Hae.” Le kajeno ho a itsoanelo. Ho thetsa eng?

⁷⁰ Jesu o itse, “Ke etsa feels se khahlisang Ntate, Ke boloka feels Mantsoe a Molimo,” hobane E ne e le Lentsoe. A ke ke a etsa letho haese Lentsoe.

⁷¹ Empa, ka baka la mokhatlo oa bona, ka baka la mokhoa oa bona, kamoo ba neng ba rarahantse batho. Ba e tsebile lipelöng tsa bona, empa mokhatlo oa bona o ba hanetse ho e boloka. Hape, ho etsa tsela e phonyohang, ho baballa batho ho se tlohele mokhatlo (“batho bohole ba Mo sala morao”), ho thibela batho ho tlohele mokhatlo le ho sala ‘Nete ea Molimo morao (etsoe E ne e le ‘Nete “ke ’Na ’Nete, Leseli”), ho ba thibela ho latela Hoo, ba itse O ne a thetsa batho. E naheneng! Monna, ea Mo tsebileng e le Molimo pelöng ea hae, Molimo o ne o ahile ka ho Eèna (“ha ho ea ka buang lintho tsena, kapa ea ka etsang lintho tsena, Molimo a se ho eèna”), o tsebile seo ‘me a se bua a se paka, ebe o hlanoha a Mo bitsa “Belsebule, le mothetsi oa batho,” batho ba habo bona, “ka Thuto ea Hae.” Oh, khili!

⁷² Nikodema o Mo tsebile e le Moporofeta. Joale, o ne a le kahara mokhatlo a rata Molimo hakana ‘me a tšaba Molimo hakana, ‘me o lemohile ka Testamente ea Khale hore Monna enoa o ötliloe ka litšoanelo ‘me o supiloe le ho nètefatsoa, e le Moporofeta ea tsoang ho Molimo. Monna eo, ke mo hlompha le haeba a tlie bosiu, o ile a fihla mono. O molemo ho feta boholo ba baruti ba rôna kajeno, ha ba tle ho hang. Qetellong Nikodema o ile a fihla. Ka baka leo, se mo nyatse, haeba uena u eso fihle. Nikodema o Mo tsebile hoba ke Moporofeta, a tšaba Molimo ke hona. A sa batle ho nyamelloa ke Monna eo, Leseli la letsatsi leo. Ho sa tsotelehe kamoo E hanyetsang kateng, hore na mokhatlo oa hae o E tlalehile e hanyetsa hakae, o bone Molimo o nètefatsa Monna eo ‘me a tseba hore E ne e le Moporofeta. ‘Me haeba E ne e le Moporofeta, Lentsoe la Morena le tlela moporofeta, ‘me O ne a tseba seo A buileng ka sona. Lea bona? Eaba o etela Jesu, a batlile ho tseba mokhoa oa ho bolokeha. Efèla ha Monna enoa e le Moporofeta, Lentsoe la Molimo le ne le le ho Eèna, ‘me O tla tseba tsela ea pholoho.

⁷³ Seo Nikodema a ne a tlameha ho ithuta sona ke seo batho ba bangata kajeno, ba mokhatlo oa bolumeli ba letsatsi lena, ba tlamehang ho ithuta sona. Seo Nikodema a ne a tlamehile ho se tseba, ke seo batho kajeno ba tlamehileng ba be ba se tsebile, maloko a mekhatlo ena ea malumeli. E ne e le ea fetisang le Moporofeta. O tlie ho Eèna ho fumana, ho Mo bolella ho mo eletsa ka tsela e isang Bophelong, ‘me Jesu e ne e le Bophelo ka sebele sa Hae. Ea nang le Mora o na le Bophelo. Ka baka leo eèna, ha a tšoanelo ho leka ho tla ithuta thuto, o tšoanelo ho tla amohela Motho. Ho joalo le bosiung bona! Lejoe la Sehlooho la sekhutlo le boetse le latotsoe. Lejoe la Sehlooho la sekhutlo ke lefe? Ke Lentsoe, ehlile bo. Kreste, Ke Lentsoe.

⁷⁴ Keha a tlameha ho ithuta ho hong. A nahana, “Be, joale, Monna enoa ke Moporofeta, Ke Moporofeta feels.”

⁷⁵ Ka hona, na le lemohile, Jesu ha a arabela potso ea hae, A mpa a mo nyatsetsa bofou ba hae. Ke ea fetisang le Moporofeta, E ne e le Lentsoe le Leseli le phatsimang la Lentsoe! E ne e le Molimo o phatsimang ka sesebelisoa seo, ho paka hore e ne e le Molimo kahara Monna. E ne e le Lentsoe. Johanne oa Pele, khaolo ea 1... Mohalaleli Johanne, khaolo ea 1, ke rialo, ke re, "Lentsoe le ne le tšimolohong, 'me Lentsoe le ne le le ho Molimo, 'me Lentsoe e ne e le Molimo. 'Me Lentsoe le ne le etsoe nama, la aha hara rōna." 'Me mona Lentsoe la Molimo le ne le chabile ka Monna enoa oa seemo se tšeremang, 'me eaba e fousafatsa mahlo a mokhatlo. Empa O tlide ho fumana batho ka bomong. Ea fetisang le Moporofeta, E ne e le Lentsoe! Ke Bophelo. Hase... O ne a sa tlameha ho u ruta ka Bophelo bo itseng bo tlang ho tla, E ne e le Bophelo ka sebele sa Hae! E ne e le Bophelo. E ne e le Leseli. E ne e le Bophelo. E ne e le Bophelo Bosafeleng, bo ne bo ahile ka ho Eèna, 'me ke Eèna feela Moabi oa Bophelo Bosafeleng. "Ea nang le Mora o na le Bophelo." Ka baka leo u na le... u ke ke ua amohela thuto ea Hae ea Lentsoe feela, u tlameha ho fumana Eèna.

⁷⁶ U re, "Oh, batho ba lula fatše ebe ba ithuta Bibele eo le mantsoe ohle a Segerike, le litlhaloso, le matšoao, le lintho tse joalo." 'Me ha ba tsebe selō ka Molimo ho feta letho! Lea bona? Che! Ea nang—ea nang le—le—le sebopetho, ea nang le leano? Ke ea nang le Mora, ea nang le Eèna, Motho. Ke Eèna ea nang le Bophelo.

⁷⁷ Nikodema o tsebile hore O tseba ka Bophelo, empa ha a tseba hore E ne e le Bophelo Bosafeleng. Ke eona, Monna eo a buisaneng le eèna, Moromuo, Leseli la letsatsi, Leseli la lefatše. "Leseli le chaba lefifing, 'me lefifi ha le le lemohe. O rometsoe ho ba Habo ka Sebele 'me ba Habo ka Sebele ha ba ka ba Mo amohela." Hobaneng? Hobaneng? Hobane ba ne ba hlophositsoe hakana, ba lutse ba hlatsoa lipitsa le lipane, le meetlo, ba ba sitoa ho bona Lentsoe le entsoeng nama.

⁷⁸ E iphetile. E boetse e iphethile. Histori e ipheta khafetsa. E, o ne a tseba hore O ne a ruile—O ne a tseba ka Bophelo, empa Nikodema ha a tseba hore E ne e le Bophelo. Ke eona taba kajeno. Batho ba bangata hakana ba leka ho etsa Jesu, oh, Moruti e moholo, ebile ba leka hore E ne e le Moporofeta. Empa ha u leka ho Mo tlaleha e ne e le Molimo, e ba imela haholo. Lea bona? Empa E ne e le Molimo, 'me Ke Molimo, 'me E tla be sa le e le Molimo. Ke phetho. Ke hantle.

⁷⁹ Lemohang, ha A ka a bolella Nikodema, joale, mohla a ttileng ho Eèna, ha A re, "Joale, Nikodema, Ke u hlompha haholo, haele moo u le e—e—e moholo Iseraeleng. Ke tla u bolella taba, u batla Bophelo Bosafeleng, mohlomong u tlameha ho bentša thuto ea hao ea sekolo. Ha u bue mantsoe a hao hantle." Mepoto. "Kapa, mohlomong u tlameha ho batla ofisi e holingoana mokhatlong oa bolumeli ba hao, ho fumana Bophelo Bosafeleng."

⁸⁰ Batho bangata ba lekile ho etsa hoo kajeno, uh-huh, ofisi e holingoana, ba batla ho tlosoa ho e—e molisa ho behoa mookameli oa selika, kapa—kapa ho behoa bishopo kapa ntho e kang eo. Ntho eo ha e amane le Molimo ka letho.

⁸¹ Shebang seo A se entseng ka pela motho oa mofuta oo. A mo nyatsetsa ho se tsebe hora eo a phelang ho eona, “U re ho ’Na u moholo Israaeleng ’me ha u utloisise lintho tsena, athe,” A re, “motho eka u khona a tsoaloe labobeli?”

⁸² “Khele,” a re, “na e re ke holile, na nka boela ka khutlela lipopelong tsa ’mè?”

⁸³ A re, “Ekare u le bishopo, mok’hadinale, mookameli oa selika kerekeng ea Pentekosta,” kapa motho ea itseng, “motho e moholo mokhatlong, ’me ha u tsebe Lengolo?”

“Oh, rōna re na le Moshe.”

⁸⁴ “Holane u tsebile Moshe, le ’Na u ka be u ntsebile, hobane ke eëna ea buileng ka ’Na.” Lea bona? Empa e seng ho latela meetlo ea bona, mokhatlo oa bona—bona, e ne e fapané. Empa Moshe o buile ka Eëna, ’me E ne e le Eëna eo Moshe a buileng tsa hae, ’me koana ha ba e tseba. Hobaneng? Ba ne ba itharile fatše ka meetlo, ha ba ka ba e tseba.

⁸⁵ Le lōna baena besō ba balang, lōna ba nka teipi ena, u se ke ua e koala joale. Motsotso feela, ha re tjamele taba ena hantle sefahlehong. Kea u rata, u molisana. ’Me ha ke leke ho iketsa tsebanyane. Haeba mohlomong ke itlhahisa joalo, u emise teipi ’me u nthapelle. Ke mpa ke leka ho u tlisetsa ntho ea ’Nete. U se ke ua e lumella ho u feta mohoalotso.

⁸⁶ Joale, ke hlompha bolaoli ba motho, le lintho tse joalo, empa ha le bopa mekhatlo ena... Le shebe Bafarasi, mohla ba sa batlang ho hata ’moho le Basadusi, hobane Basadusi ba sa lumele e—e lengeloi kapa—kapa moea, kapa tsoho, kapa le letho, ’me Bafarasi ba ne ba li bolokile bobeli, ’me ba ne ba loantšana. Joale ba thuto ea bonngoe ba lumela ntho e ’ngoe, ba botrintase e ’ngoe, le Methodise e ’ngoe, le Presbetriene e ’ngoe, ’me le seha meelinyana. ’Me le fumana eng? Karohano ea boena. Ebile, re tla fumana sebaka seo kahara Bibele nakoaneng feela, hore na seo keng, le seo Molimo a se buang ka eona.

⁸⁷ Joale, che, ha A mo laela ho bentša. A mpa a mo nyatsetsa ho se tsebe ntho ea makhonthe. “Uena u leng moholo Israaeleng, ha u tsebe lintho tsena? Ekare ha Ke u bolella lintho tsa lefatše, ’me u sa utloisise...” Nahana! “Moholo, bolaoli bo phahameng kerekeng ea molao, bishop, mok’hadinale, feela ha u utloisise ha Ke u joetsa ka litaba tse qalang tsa lintho tsa tlhaho, ebe litaba tsa moea tse tsoang Leholumöng u tla li utloisia joang?”

⁸⁸ Empa ralihlapi oa khale ea sa balang a bile a sa khone ho ngola lebitso la hae, o ile a E utloisia, lea bona, eaba o behoa

hlooho ea kereke Jerusalema, Petrose. Lea bona? Oh, “Bohle bao Ntate a ’Neileng bona, o tla tla.” Lea bona? Ba khona ho E bona. Ba E lumela. Ba tsamaea ka Eona, ba tseba ho se letho le ka ba thibang

⁸⁹ Joaloka mopolasi. Hase botle ho etsa motlae, empa e le ho etsa setšoantšo. Ho thoe mopolasi o kile a alamisa sethole sa khoho, ’me ba sa fumana mahe a lekaneng, eaba o e alamisa lehe la letata. Mohla letatana le ne le qhotsoa, e le mokhelo oa motonana oo litsuanyana tseo li kileng tsa o bona. Ka sefahleho se selelele se makatsang, ’me le tsamaea le tsamaea koakaoaetsa bakeng sa ho kakatletsa, ’me—’me litsuanyana tsohle li ne li ja kahara jarete li kobola. ’Me tseo e se lijo tsa eona, ka tšoanelo. Eaba tsatsi le leng sethole sa khale se li potetsa ka mora moliko, ho kola mehloenyane, ’me ka nqane ho leralla e le e—e letšana. Eaba moea o foka o nyoloha letšaneng, ’me la fofonela metsi. Ke tlhaho ea lona feela. Sethole sa khale se kile sa ka re, “Keke, keke, keke, khutla bo!”

⁹⁰ La re, “Koa, koa, koa,” la toba metsi hantle. Hobaneng? E ne e le letata, le ho qala. Ho sa tsotelehe na sethole se kakatlelitse hakae, e sa ntse e le letata.

⁹¹ U joalo motho ea reretsoeng Bophelong Bosafeleng. Mohla a bonang Leseli la Molimo, ha ho mekhatlo e lekaneng lefatšeng ho mo khutlisetsa ho eona ka mehoo e kakatletsang. Che. Hobaneng? Ke tlhaho ea hae. Mohlomong khale a ejá le bona, ’me a ejá nyee ea bona le lilö tsa kopanelo, empa joale o fihlile o fumane ntho e fapaneng, ka hona o a e tseba. “Linku tsa Ka li tseba Puo ea Ka,” ho itsoalo ke Jesu, “osele li ke ke tsa mo latela.” Mohlomong ba ntse ba latela ntho e fapaneng, empa ntho e fapaneng e larile tlase kahara bona. E re ba utloe ’Nete hang, ’me u ba shebe. “Bohle bao Ntate a ’Neileng bona ba tla tla.”

⁹² Yaa, O ile a mo nyatsetsa ho hloka tsebo ha hae. “U le moholo Iseraeleng, athe ha u tsebe litaba tsee? U tšoanetse ho tsoaloa labobeli!” Joale, monna oa tlhaho, ke batla ho... le elloe taba e ’ngoe mona, “U tšoanetse ho tsoaloa labobeli.”

⁹³ Joale, bophelo ba tlhaho, haeba re na le bophelo ba tlhaho, ho atleha bophelong bona ba tlhaho, linthong tsa tlhaho, re tšoanetse ho tsoaloa ka tlhaho. Ha ba u rutle sefateng kae-kae, lea bona, ho u hotölla ka tsela e itseng. Ba e lekile, empa ha ea sebetsa. Eka khona ebe tsoalo ea ’nête, tsoalo ea tlhaho, ho u nea sehlahlo sa ho fumana lithokutlo tse hlano, ho tsamaea, ho bua, ho bona, ho latsoa, ho phopholetsa, ho fofonela, ho utloa, ho tsamaea hohle, le lintho tseo, hobane mohlang oo o motho, ’me u—u na le tokelo linthong tsena tsohle hobane li khema le bophelo ba tlhaho.

⁹⁴ ’Me, tsoalong ea mofuta oo, ka linako tse ling re hlalefela bohlale ba lefatše haholo kapa nqa litaba tsa lefatše, ho behoa

Lipresidente le—le baithuti ba baholo, le litsebi tsa mak'heniki le boramahlale ba saense, le lintho tse joalo. 'Me kamehla lea tseba, ho tloha tšimolohong, hore ke bana ba Kaine ba neng ba topetsoe bohlale ba mofuta oo; e seng ba Setha, e ne e le boramanku ba ithobileng. Empa bana ba Setha e ne e le batho ba barapeli. Empa bana Kaine esale ba le masene, ba qahame, mahlale a saense, lingaka le monna e moholo. Ke hantle. Bibebe e itsalo, lea tseba. E ruta taba eo. 'Me ba tletse borapeli haholo, empa qetellong ba timetse. Re rua bohlale ka ho kena sekolo, ho hapa likhau tsa thupello, le lintho tse joalo, re fetoha bohlale haholo, masene, 'me re khona ho etsa lintho le ho bua lintho, 'me ka linako tse ling re rothofatsa monna ea tletseng Moea. Na Jesu ha a rialo, "Bana ba lefatše lena ba bohlale ho feta bana ba 'Muso'? Ehlide, hobane bao, ka hlalefo ea bona ba ka khona—khona ho bua le ho qhekella le ho menamena puo, 'me ba nka Mangolo 'me ba A sotha hore A bue seo A sa se boleleng.

⁹⁵ "Oh, ehlide ha Le bolele joalo." Ha motho a rialo, sutha ho eèna. Molimo o hlokomela Lentsoe la Hae, le a tseba, Bibebe e itsalo. E ngotsoe ka tšoanelo ea Eona hantle. Lea bona? Joale, E ngotsoe tjena ho thetsa, kapa hore E khope ba bohlale. E bonolo haholo, ka baka leo batho ba khoptjoa ke Eona. Lea bona? Ke hantle.

⁹⁶ Bohlale bona bohle le lintho tseo ba khonang ho li bokella, koana, empa e tsoa ho...tsoalo eo e tsoa tlase, lefatše lena. E tsoa lefatšeng, 'me e khahlano le Moea oa Molimo. Tsoalo ea pele, e re ötla ka mahlahahlaha mona, e etsa motho ea shoang, ka baka la ketso ea sebe tšimong, ho tlisa motho lefatšeng ka mosali. Me motho ea tsoetsoeng ke mosali o na le matsatsi a se makae, empa motho ea tsoetsoeng ke Kreste ke oa Bosafeleng. Jobo o itse, "Motho ea tsoetsoeng ke mosali o na le matsatsi a seng makae 'me o khotše litsietsi." Lemohang, empa motho ea tsoetsoeng ke Kreste, o tlameha ho tsoaloa Holimo. Joale, empa motho ea tsoetsoeng ke lefatše, o ba bohlale 'me lipolelo tsa hae li ka pupetsa ka hlalefo.

⁹⁷ Le shebe hlalefo ea diabolosi, o thetsitse moprista ofe le ofe ea kileng a fihla lefatšeng. Ehlide o khonne bo. O ile a thetsa, o sa ntse a etsa hona hoo. Yaa, ehlide bo. O ne a le masene, empa o khahlane le thaka ea hae, tsatsi le leng, E ile ea mo hlola. 'Me seo re tlamehang ho se etsa feela ke ho itšetleha ka Eèna, O se a mo hlotse. Lea bona?

⁹⁸ Empa bo tsoa tlase, 'me bona, bohlale bona boo motho a bo bokellang ho paka le ho bontša lintho tsena tsohle tsa hobaneng motho a tlameha ho etsa *sena* le motho a tlameha ho etsa *sane*, bo khahlano 'me ke bora (kelello ea nama) ho Molimo. Lengolo le itsalo. Hantle. Ho sa tsotelehe masene, ba khona ho sotha. Ke batla motho a mpontše moo Molimo a kileng a thea mokhatlo kapa hona ho laela o mong, empa o nyatsuoa kahara Bibebe ena. Ho sa tsotelehe masene ao ba

a lekang, e khahlano! Kamoo bohlale bo ka emang 'me ba u menamena ka puo, 'me ba u nyenyeftsa *hakaalo* ka ho u bolella ka eona, empa bo khahlano le Mangolo.

⁹⁹ Motho o mpoleletse, "Moena Branham, ke koetlike taba e le 'ngoe khahlano le uena." Ha thoe, "U mo-Jesu Feela."

Ka re, "Ha ke eèna. Ha ke setho sa mokhatlo ofe."

¹⁰⁰ Mookameli oa lebatooa le itseng o rometse, tsatsi le leng, le ho re, "Motho o mpoleletse hore u mo-Jesu Feela, Moena Branham."

Ka re, "E khahlano. E fosahetse."

¹⁰¹ Ha thoe, "Ba mpoleletse hore u lumela lerato le lokolohileng, hore bona ba tlameha ho tlohela mafumahali a bona 'me ba tsome..." Joale, lea bona, ao ke mashano a diabolosi. Le tseba seo.

¹⁰² Ka re, "Ke hlile ke khahlano le lintho tseo tse thulanang le mangolo *hakaalo!* Ke lumela khalalelo le bohloeki. Ke lumela hore monna o tlameletsoe ho mofumahali oa hae ha feela ba ntse ba phela." Ha u a tšoanela ho mo nka pele u rapetse.

¹⁰³ 'Me Jesu Feela, sehlopha sa Jesu Feela, ha ho letho khahlano le bona, ba lokile joaloka ka sehlopha sefe, ho 'na. Empa ba kolobetsa ka phoso, ba kolobeletsa nchafatso. Ke lumela hore re nchafatsoa ke Moea o Halalelang, e seng ka metsi. Ehlide ke sebelisa Lebitso la Jesu Kreste kolobetsong, 'me ha ho Lengolo le leng kahara Bibebe ho tšehtsa...ho le hanyetsa. Kahara Bibebe ha ho motho ea kileng a kolobetsoa ka Lebitso la "Ntate, Mora, Moea o Halalelang." Ke batla motho ea ka tlang ho mpontša moo motho a le mong a kolobelitsoeng joalo. Hape, haeba e banana le mangolo, e tlohele!

U re, "Ha e etse phapang ea letho."

¹⁰⁴ E entse joalo ho Pauluse. O ba laetse ho kolobetsoa hape, ka Lebitso la Jesu Kreste, le ho amohela Moea o Halalelang. 'Me Pauluse o itse, "Ekare ha lengeloi le tsoang Leholumōng," Bagalata 1:8, "le fihla, le ruta Evangelie esele," e fapanang le eo a e rutileng, "le rohakoe."

¹⁰⁵ Lea bona, ke moetlo. Ke qoqile le monna ea phahameng nakoana e fetileng. Ha thoe, "Moena Branham, nke ke ka khona. Kea tseba hore taba Eo e nèpahetse," a re, "empa nka etsang ka Eona?"

Ka re, "E mamele!"

A re, "Khele, ke—ke motho ea seriti bathong besō."

¹⁰⁶ Ka re, "Empa ke batla seriti ho Molimo, u mamele Lentsoe la Hae. U tlameha ho ikhethela, na u tla sebeletsa Molimo kapa motho?"

¹⁰⁷ Empa ba inkela mokhatlo oa bona, ba rala meralo ena kahara eona, ba e latela hantle. E qalile ho sebelisoa khetlo la pele kahara kereke ea Roma e Katolike. Ke hantle. Ke batla

mothro ea ka mpontšang ntho e fapaneng. Ke balile histori, le 'na, le a tseba. Le hopole, eo ke kolobetso ea Katolike, 'me mang le mang ea kolobelitsoeng joalo o kolobeletsoe selekaneng sa Katolike. Ke tla e paka le pele bosiu bo esa, ha Morena a ratile. Ke hantle. Ke ka baka leo u tšoanelang ho khutla.

¹⁰⁸ Hase Jesu Feela. Joale, batho ba lokileng ba bangata kahara kereke ea Jesu Feela. Batho ba lokileng ba bangata kahara Assemblies of God, eona Church of God, Methodise, Baptise, Presbeteriene, le Katolike. Empa ha ho Kereke hara tsona, ha ho le e 'ngoe. Batho ba teng ka mono bao e leng litho tsa Kereke. Empa mokhatlo oa bolumeli ba bona hase oona o ba etsang Kereke, kamoo batho ba lekang ho e sebetsa. E fosahetse. Re tla theoha ho le fa Lengolo nakoaneng feela.

¹⁰⁹ E, ho ba mahlahahlaha holima lefatše, u tlameha ho tsoaloa ka tlhaho ho ba mahlahahlaha, 'me tsoalo ea mofuta oo e re fa bohlale kamoo ke boletseng. Lea bona? 'Me re ba masene, hlalefo, lihlalefo tsa rōna li re ōtla ka hoo. Empa u hopole hore tsoalo eo, qalo ea eona, e khahlano. Ke ea lefatše 'me e khahlano le Lentsoe la Molimo, ke bothoto ho Molimo le ho leano la Hae, ha e lemohe leano la Molimo. Holane ho se joalo, Nikodema a ka be a tsebile ho feta kamoo Jesu a tsebileng ka Eona. Lea bona? "Ekare u le moholo Israaeleng?" Lea bona? Le bona moo mekhatlo ea lona ea malumeli e habileng teng, moo banna ba lōna ba baholo ba kopanang ho rala maano a bona, le lintho?

¹¹⁰ E reng ke le bolelle taba ena. Nako le nako ha Molimo o romela Leseli holima lefatše, mabapi le taba e kahara Lengolo, ba e baleha hantle. 'Me hang hoba monna eo a tlohe, ba bopa mokhatlo ka eona. 'Me hang ha ba e hlophisa, ke batla ho botsa rahistori ofe (ea leng teng mona joale, kapa holima liteipi) ho tla tla mpontša. Enereha motho a hlophisa kereke, e shoeletse hantle mono 'me ha ea boela e tsohile. E khahlano le Molimo. E khahlano le Mangolo. Ka baka leo ke khahlano le eona, ntho efe eo Molimo a leng khahlano le eona. Haeba Molimo a ahile ka ho 'na, ke ema khahlano le seo Molimo a leng khahlano le sona. Sera sa Hae ke sera sa ka. Kereke ea Hae ke Kereke ea ka. Bophelo ba Hae ke Bophelo ba ka. O nehelane ka Bophelo ba Hae, O fetohile 'na hore 'na ka mohau oa Hae ke tle ke tšoane le Eèna. Lea bona? Re anantse malulo. O fetohile moetsalibe ea joaloka 'na 'me a nchoela, ho nka sebaka sa ka, hore 'na ke be morao oa Molimo joaloka Eèna mohlang oo.

¹¹¹ Joale na le bona moo mekhatlo ea lōna ea malumeli e seng e fihlile teng? (Ha re eso qale.) Ho hlalefa ka nqa bohlale ba lefatše empa ho shoa leanong la Molimo! Joale ha re hetleng morao, ho emisa mona nakoana.

¹¹² Adama o ne a le khahlano le leano la Molimo, kaha a sa mamela Lentsoe. Ho leka ho iketsetsa sekhurumetso, borapeli.

E ile ea hloleha, 'me esale e hlolehile, seo motho a lekang ho se etsa. Nimrode o ne a fositse. Kore o timetse. Ba ne ba leka ho etsa'ng? Ho bopa mokhatlo.

¹¹³ 'Me ka morao ho moo, qetellong hoba ba itlhophise, Jesu o ba fumane, ba shoele! Ho re, "Le na le mahlo 'me ha le bone. Le na le litsebe 'me ha le utloe." Lea bona? Ho re, "Le lifofu, le tsamaisa lifofu. Ekare ha sefou se tsamaisa sefou, na li ke ke tsa oela selomong?" A re, "Uena u leng moholo Iseraeleng, 'me ha u utloisise le seo tsoalo e leng sona? Athe, hola oa suthela hole le meetlo eo, 'me ua itšoarella ka Lentsoe, u ka be u tseba hobane Ke tlie ho fa batho tsoalo e ncha. U ka be u tsebile letsatsi la Ka. Holane u tsebile Moshe, u ka be u tsebile le 'Na. Moshe o buile ka 'Na 'me o itse Ke tla tla, 'me ke 'Na enoa! 'Me ekare ha Ke sa etse lintho tseo Moshe le baporofeta ba boletseng Ke tla li etsa, u se lumele ho 'Na. Ekare ha Ke sa etse mesebetsi ea Molimo, u se lumele ho 'Na. Empa ha u sa lumele ho 'Na, ke leng Motho, ekare ha u sa lumele ho 'Na hobane Ke le Motho, athe ke etsa mesebetsi ea Molimo, u mpe u lumele mesebetsi hoba ke eona e pakang ka seo Ke se etsang." Lea bona?

¹¹⁴ Empa hape, joaloka kajeno, holane A phetse kajeno, Assemblies of God e ka be e fumane e mong, ba thuto ea Bonngoe ba be le e mong, 'me mang le mang o ne a tla ba le Jesu. Ehlide, mokhatlo oa bolumeli ba bona o tlameha ho jara bolo. Lea bona? Haeba e sa tsamaee, ha ba khone. Ho arola kopano ea bona.

¹¹⁵ Ke hopola moshanyana ea bitsoang "Davida e Monyenyane." Ke monna, o nyetse joale, kea kholoa o na le lelapa. Ke hopola mohla a qalang. Ka ea St. Louis. Ke utloile bareri ba bashanyana, ba neng ba ema mono 'me a re, "Jesu, moshanyana e monyenyane, ea tsoaletsoeng sejelong. Mommy, kana e fell a kae?" Empa e seng moshanyana eo. O ne a hlobola baki ea hae, a qotsa mohlolithero 'me a rera. Empa e ne e le eng? E ne e le mo-Jesu Feela. Ntate oa hae, Mongh. Walker, e le setho sa Jesu Feela. Khele, Assemblies keha e sa khone ho e mamella. Ba tlameha ho ipatlela Davida e monyenyane. Khele, ba bang le bona keha ba tlameha ho ipatlela Davida e monyenyane. 'Me ka mohla o mong eare moshanyana eo a sa tšoere kopano tlase Florida, a mpitsa ho theoha ho tla mo thusa. 'Me 'na le Moena Moore ra bala maqephe a mabeli a karolo e kapele ea litaba, e se letho haese mabapi le bo-Davida ba banyenyane, kereke efe le efe keha e ipatletse Davida e monyenyane. Oh, jo 'na! Khele, hola sehlopha sa baholo ba Molimo sa elella neo ea mothaka eo, a ka be a sheshenetse meea e likete 'Musong, lea bona; ho mo bolella ho tela moetlo oa hae oa motho le ntho ena ka mokhoa oo. Molimo o no o behile neo bophelong ba hae, e sebeliseng!

¹¹⁶ Khetlo la pele ha pholiso ea khalalelo e qala, mang le mang keha a utloa maikutlo matsohong a bona 'me ba khona

ho fofonela maloetse. 'Me, oh, khili! Hobaneng? Ba ne ba tlamehile ho e etsa, mokhatlo oa bona o ne o saletse morao lephallong. Lea bona, mekhatlo ea lōna e etella morero oa Molimo pele, le nahana joalo. Empa keha Molimo a bolokile Kereke ea Hae e tsoelang pele ka ho tšoana, 'Mele oa sephiri. Ha u ingolise nthong Eo, u tsoalloa ho Eona.

¹¹⁷ Hlalefo bohlaleng ba lefatše, empa ho shoa ka nqa merero ea Molimo. Mpolelleng, hleng. Mpolelleng, hleng. U ka ba bolella 'me ua ba pakela phoso ea bona, ka Lentsoe la Molimo le ka tšepiso, 'mele le joale ba ke ke ba e bona. Nka lula fatše hantle 'me ka tšoara Lentsoe 'me ka u bontša hore mokhatlo oa hao oa bolumeli o fosahetse. Nka u bontša hore litumeloana tseo u li bolokileng kajeno li fosahetse, lea bona, litumeloana tsena tsa kereke. Ho bontša hore e fosahetse, 'me ba tla re, "Be, re rutile ho lumela *sena*." U a bona, ho latela mohopolo oa ka, ke—ke khapane, haeba le tseba seo ke buang ka sona, ke libeso tsa kanono. Yaa, ke hantle. Ha ba khone ho e bona. Jesu o itse, "Lōna, lōna—lōna ha le bone, hore le tle ho 'Na 'me le fumane Bophelo."

¹¹⁸ Nikodema e ne e le eo, monna ea hlomphuoang, monna e moholo, bishopo kahara kereke ea hae, monna ea lebitso, a ratoa ke mang le mang, 'me o tlide ho Jesu 'me a sa tsebe letho ka bophelo ho feta—ho feta letho. O ne a sa Bo lemohe mohla Jesu a mo nyatsetsang hona, empa o ne a tšepahetse haholo haele moo a tlide. Ba bang ba bona ha ba ka ba tla. Ba emella thokoana le baprista ba baholo le Bishopo *Sekete-kete* le *Sekete-kete*. Lea bona? Ba emella thokoana 'moho le bona, ba mpa ba ikhethela meetlo ea bona ea baholo ba bona sebakeng sa ho utloa Lentsoe la Molimo.

¹¹⁹ Joale, u ka ba bolella, ba ke ke ba e mamela. U ka khona feela hantle feela... Na u ka nahana... Ke batla ho le botsa taba. Ha kea ikemisetsa ho thunthetsa borapeli. Joale, lōna baena ba mametseng teipi, ha kea ikemisetsa ho thunthetsa borapeli. Le reng ha nka tsoa mona, 'me—'me ebe monoko oa sefate o a mpotsa, "U khona joang ho tsamaea holima lefatše le ka mohla? Ke na le bophelo, ke monoko oa sefate sena"? O ka paka hore o na le bophelo, empa ke ba mofuta o fosahetseng. Haeba o batla ho tsamaea, mokhoa o le mong ho tsamaea le ka mohla, ho bona, ho latsoa, ho phopholetsa, ho fofonela le ho utloa, holane o ka bua 'me oa mpolella 'me oa kopa seo, mokhoa o le mong, o tlameha ho tsoaloa joaloka 'na. Amen. O ke ke oa utloisia ka mokhoa osele. Empa haeba o tsoetsoe joalokaha le 'na ke tsoetsoe, o tla tseba lintho tseo ke li tsebang. Amen. Oh, khili! E, monghali. U ke ke ua khona ho joetsa monoko oa sefate kamoo re tsamaeang kateng 'me re le sehlahlo, o tla tlameha ho amohela bophelo bo tšoanang le ba rōna ho e utloisia. Le ka Moea ho joalo! Le ka Moea ho a tšoana, ho seng joalo u ke ke ua E utloisia. Ha ho hlokahale

ho leka ho E nahanisisa, tloo ho Eèna pele. Hobane, "Motho ha a sa tsoaloe labobel, a ke ke a bona 'Muso," O itsalo, hono ke ho, "O utloisisa." U tlameha ho tsoaloa labobel ho E tseba.

¹²⁰ Be, u re, "Ke tsoetsoe labobel." 'Me u hana Lentsoe? U ka khona joang? Bophelo ba hao ke bona bo u pakelang eona, sehlopha sa hao seo u imatahantseng le sona, nonyana tsa siba le le leng. Lea bona? Ako eme hofihlela re kena linthong tseo metsotsong e 'maloa, lea bona.

¹²¹ E tlisoa ke Moea. U ka bolella joang batho ba sa tsoaloang ke Moea lintho tsa Moea? Ho utloisia lintho tsa Moea u tlameha ho tsoloa ke Moea. Eèna... Jesu o itse, "Moea o fokela moo o ratang, ha u tsebe moo o tsoang le moo o eang teng." Lea bona? Le ea tsoetsoeng ke Moea o joalo, ba ke ke ba u bolella. Motho ea tsoetsoeng ke Moea ha a inahanele, o lumella Molimo ho nahana.

¹²² Na le re nka ema kalaneng mona, ka nahana ka bolella monna ea motseo koana, "Lebitso la hae ke *John Doe* 'me o tsoa tulong e *itseng-le-e-itseng*, o entse *sena*. 'Me o nyetse mosali e mong morao koana, lilemo tse mashome a mabeli tse fetileng, 'me a tsoala bana ka mosali enoa. Ebile o tlameha ho khutlisa ntho *ena*, 'me a etse *sane*," le nahana hore, ka ho inahanel, nka etsa hoo? Bohlale bo joalo ha bo fumanoe tsoalong ena ea lefatše mona. Bo ka mose oane. Bo tlameha ho tsoa Holimo. Ka hona ha u tsoaloa ke Moea, Holimo, Bophelo bo nong bo ahile kahara Eo Ea entseng lintho tseo, ho itsoe, "Mesebetsi eo Ke e etsang, le lōna le tla e etsa."

¹²³ Tsoalo ea hao e tlameha ho fetoloa. U thetsitsoe. Mohlomong u buile ka lipuo, mohlomong u qhometsé holimo le tlase, mohlomong o hooelelitse, mohlomong u entse *sena* sohle, *sane*, se *seng*, mohlomong u bile e—e setho se tšepehang. Le Nikodema o ne a le joalo, lea bona, empa o ne a hloka tsoalo. 'Me ha u hana Lentsoe, u leka ho Le beha nqa esele 'me u Le fetola ntho e 'ngoe, 'me u Le hasanya ka mokhoa oo. Ebile Jesu o itse, "Mehlolo e tla tsamaea le ba lumelang ke eona ena. E-eang ka lefatše lohle le bolelle babopuoa bohle Evangelii." Ha feela Evangelii e boleloa, mehlolo ena e tla latela. Mpolelleng moo A kileng a e amoha kereke. Mpontše Lengong moo A itseng, a kileng a bua, "hakana feela." O itse, "Lefatšeng lohle le ho sebopuoa ka seng!"

¹²⁴ E, u tla tlameha ho amohela Bophelo bo kang boo A neng a bo ruile, ho phela Bophelo ba Hae. 'Me ha u bona Bophelo ba Hae, joale u tla tseba Lentsoe la Hae. Ke hantle. "Mohla Eo," leemeli la motho, e seng mohopolo, e seng monahano, e seng maikutlo, empa "mohla Eo, Moea o Halalelang, a tlileng, O tla nka lintho tsena tseo Ke le boleletseng tsona, 'me a le senolele tsona, le ho le bontša tse tl Lang ho tla." Ke eona tsoalo eo. Eo ke netefatso ea hore Ke Lentsoe. 'Me motho ea itlalehang a

ruile Moea o Halalelang, 'me a hana Lentsoe la Molimo 'me a Le fetisetsa nqa e 'ngoe, na ebe Moea o Halalelang o ka hana Lentsoe la Oona ka Sebele? Joale mpontše mokhatlo kahara Lentsoe. Ke moo he. Lea bona? Ho lokile.

¹²⁵ Le nahanang ka rakhoebo...Joale mona kereke ea rōna e saletse morao hakana. U nahanang ka rakhoebo ea qalileng khoebo tlase mona, ke e...ke khoebo e atlehileng, 'me a tlamehe ho fumana thuso kapele, ebe o thola sehlopha sa banna ba shoeleng, litopo, a re, "Na le ka tla ntšebeletsa?" Ba ke ke ba mo tsoela khomo.

¹²⁶ Ke ka baka leo mokhatlo o sa hholeng o tsoha hape le ka mohla. Lea bona? Sehlopha sa bafu ba sa lumeleng ba phuthehileng 'moho joaloka Nimrode, joaloka Kore, joaloka ho theoha le mongoaha. Ho ka tla joang...ha A eso o sebelise le ka mohla, ha eso sebelise mokhatlo le ka mohla. A ke ke a etsa joalo. O fapophile thato ea Molimo, o tsetse moeli. O hole le letsoho ho nanabeloa, o hole haholo ho ka tsongoa.

¹²⁷ Na u ka ea ho motho ea sa khoneng ho tsamaea, a holofetse hlooho, letsoho le leoto, u batla hore a u mathele lephallo la maoto, ho matha lephallo lena ka mamello, ho beella kathoko...Lea bona? Motho eo a ka khona joang a sa khone ho sisinyeha, a holofetse? U tla tlameha ho mo phekola bohole ba hae, pele, ke hona a ka mathang.

¹²⁸ Ke sona seo mokhatlo o se hlokang, ke pholiso ea Khalalelo. Oh, khili! Kea tšepa ha ke fumane...ha ke utloahale ke nyatsa. Lea bona, ha ke nyatse, empa ha sepekere se sa ngomeloa se tsomuha habobebi. Lea bona? Ke ka baka leo Moea o Halalelang o sa khoneng ho sebelisa mokhatlo oa bolumeli. Hang feela ha o...

¹²⁹ Le hopole, ke kholoa Martin Luther a ne a ruile Moea o Halalelang. Ehlile. Mohlomong hase ka tekano ea Oona kajeno, hobane O ne o eso abjoe. Re se re fetile mona, ho lōna batho ba tabernakele, mona holima tlapantšo. Empa o ne a hlile a lumela ho Molimo, "me ea lumelang o na le Bophelo bosafeleng." Ke itse ha ho motho ea e lumelang joaloka 'na, hofihlela hoseng hona, ke utloile Charles Fuller ha ke theoha. Le eēna, o a lumela, hore tsoalo e ncha hase kolobetso ea Moea o Halalelang. Tsoalo e ncha ke ho tsoaloa. Moea o Halalelang ke kolobetso. Lea bona? Ke hantle.

¹³⁰ Joale re fumana motho enoa a tlameha ho tsoaloa labobelí ho ba sehlahlo. Ke hantle, ho tsoaloa ke nama, u fumana bohlale ba lefatše. 'Me bohlale ba lefatše bo mamela mosuhe oa bona oa nama. Hantle. Ka baka leo motho ea sa tsoalang bocha, ha u mo joetsa ka Lentsoe la Molimo, ba tla mamela bishop oa bona, mookameli oa bona oa selika kapa mokhatlo oa bona, sebakeng sa Lentsoe la Bophelo. Hobaneng? Ha e tsebe letho haese ntho eo. "Khele, u a tseba, ka tsatsi le leng

nka behoa mookameli oa selika.” Khele, Nikodema e ne e le moholo. E ne e le ka nqane ho mookameli oa selika, e le ka nqane ho e—e—e molisa, e le ka nqane, e ne e le moholo Iseraeleng. Lea bona? E, ’me e ne e le monna e moholo, e le setho sa sehlopha sena ’me a sa tsebe ka Molimo ho feta letho. Lea bona? Sohle seo a se tsebileng e le histori e itseng.

¹³¹ Molimo oa histori o thusang haeba E se eèna kajeno? Molimo oa Moshe o thusang haeba E se eèna Molimo eo kajeno? Molimo o ka pholosang motho sefapanong o thusang haeba o sa khone ho pholosa motho ea maemong a tšoanang kajeno? Joalokaha ke buile khafetsa, “Ho thusang ho fepa nonyana ea hao ea k’hanari lithotse tse nonneng le livithamini, ho natlafatsa mapheo a eona le ka masiba a matle, u ntano e hlahlela hokong?” Ha ke e utloisise. Ako leke ho ’molella ka Molimo ea matla le ka lintho tseo, u ntano mo hloma kahara mokhatlo o sa lumeleng le lintho tse joalo. Lea bona? E tsoile taolong. Ke ka baka leo e hlolehlang, o shoele. O ke ke ua khona ho o sebelisa. Molimo ha o eso o sebelise le ka mohla.

¹³² Nahanang feela, Moea o Halalelang le ka mohla, nakong efe, ha o eso sebelise mokhatlo, ha e hlahe Lengolong kapa ha e hlahe historing. Motho ea teiping, kapa ea leng teng, haeba a ka mpontša moo Moea o Halalelang o kileng oa nka mokhatlo ’me oa qala khato holima lefatše, tloo mpolelle. Ako mpolelle na e hlahe bukeng efe ea histori. Lea e tseba ha e hlahe Lengolong, ka baka leo ke batla u mpontše hore e tsoa historing efe. Molimo ha o eso sebelise ntho e kang eo. O sebelisitse motho a le mong, ka linako tsohle.

¹³³ Ho lokile, ho tsoaloa ke Moea. Joale, ho tsoaloa ke nama, le ho rua bohlale ba lefatše, bohlale bo tla mamela mosuhe oa bona oa nama. Ho tsoaloa ke Moea ke ho lumela le ho mamela thuto ea Bibele, ka Moea o Halalelang. ’Me monna ea tsoetsoeng ke Moea o tla mamela Lentsoe la Molimo ho sa tsotelleh seo moetlo ofe o mo bolellang sona. Ke eona feela. U tsoetsoe hape, ka baka leo u a bona. Ho ba setho sa mokhatlo, ho beha tšepo eohle ea hao moo... .

¹³⁴ Joale, ha ke re batho ba kahara mokhatlo ha ba tsoaloa labobeli. Joale, ke tla e finyella metsotsong ’maloa, ha Morena a ratile. Ehlide, ba joalo, empa ke batho ka bomong. Hase mokhatlo o tsoetsoeng labobeli; batho ba ka mono ba tsoetsoe labobeli ka bomong. Empa mokhatlo o mo khaola feela ho Molimo, ke phetho seo o se etsang, o a u arola. Ke hantle. Ho sa tsotelloe nama, bolumeli ba mokhatlo bo ruta nama, bo khahlano le thato ea Molimo ka linako tsohle.

¹³⁵ Ho *tsoaloa labobeli* ho bolela ho “tsoaloa ho tsoa Holimo.” *Hape* ke ho re “ho tsoa Holimo.” Kea kholoa le a e tseba, lea bona. Ho *tsoaloa labobeli* ho bolela “ho tsoaloa ho tsoa Holimo.” Joale, le tla bona, u ka e hlahloba ha u batla joalo,

tlotlontsoe. Lea bona, e bolela “tsoalo e tsoang Holimo.” Hobane, u tsoaletsoe *mona*, joale ho tsoaloa labobel i u tlameha ho tsoaloa holimo *Mona*, ho tsoaloa labobel i. ’Me ’Muso oo o phahame haholo ho feta ’muso ona, o feta ’muso ona ka boholo, hofihlela ’muso ona e le bohlanya ha o bapisoa le Ono, ’me ntho Eo ke bohlanya ha e bapisoa le ena.

¹³⁶ Joalokaha ke buile khafetsa, ha se khale ha ’na le mohatsa re tloha ho ea reka likorosari, ekaba likhoeli tse ’maloa tse fetileng, eaba re bona mosali ea apereng sek’hete. ’Me e le semaka se fetisang ho se bona nakong e telele.

¹³⁷ Be, hoseng hona, ha ke bue ka lenyatso, ke utloile o mong oa mekhatlo e meholo e tummeng. ’Me ’na le morali oa ka re mameitse radio e le ha re tloha ho ea tlotsa kereke. ’Me ba ntse ba bina sefela, ntho e qapiloeng ke *Sekete-kete*, ’mino o kang oa tlelasiki moo e kang basali ba bipetsa moea oa bona hofihlela ba pulufala sefahleho sa botala ba leholimō, ’me le re ntho eo ke ’mino. Ke ho tsetsela. Ke rata ’mino oa khale o monate oa pentekosta, o tsoang pelōng ea hao. Mohlomong ha u khone ho tšoara le noutu, empa u a bina leha ho le joalo, u hlahisetsa Morena lerata la thabo. Ke nahana e le eona ntho ea moea. Kea e rata. Empa ho hula moea oa hao hofihlela o pulufala sefahleho, ’me u a shoa u ntoo boela o tsoha, ke mang... Ha u tsebe le seo u se binang ka bo-uenia. U ka lebella motho e mong ho tseba joang? Ke eona. Jesu o itse, “Re bolela tseo re li tsebang.” Ke hantle. Ke hantle. Seo re tlamehang ho se etsa ke ho bina seo re se tsebang lipelōng tsa rōna, seo re se utloang.

¹³⁸ ’Me hoba ba a qete, morali oa ka o ntse a ithuta ’mino, eaba o re, “Moena,” a re, “e ne e hlide e le tlelasiki.”

¹³⁹ Ka re, “E, empa u nahana hore ke batho ba bakae k’hoaereng eo ea ’mino ea batho ba ka etsang mashome a mahlano ba nang le lephoka la sakrete moeeng oa bona? Ke ba bakae k’hoaereng ha u nahana, maobane e ne e le bosiu ba Moqebelo, ba sa noang senonyana sa boithabiso? Ke basali ba bakae mono ba pommeng moriri oa bona? Ke ba bakae ba tšasitseng meikapo, etsoe molisa e mong a buile matsatsi a ’maloa a fetileng, ‘Molimo o ntlafalitse lefatše mohla A ne a etsa ferefe’”? Kanthe, re tseba mosali a le mong kahara Bibele ea ferifileng sefahleho sa hae, ’me Molimo o mo fepile lintja. ’Me rōna, mang le mang ea tsebang letho ka kereke le ka bahetene, o tseba ferefe e le setso sa bahetene, haesale. ’Me, leha ho le joalo, basali ba e etsa. ’Me banna ba tsuba, ba noa, ba itšoere joalo. ’Me ba eme mono ’me ba bina, ka mantsoe a kang ao. Re tla kena ho eona hantle mona metsotsong e ’maloa. Ke hantle. Ho ba setho sa monahano oa mokhatlo, athe, masoabi a tla ba maholo Kahlolong, ho latela mohopolo oa ka.

¹⁴⁰ Ho tsoaloa ke Moea, ke ho lumela le ho itšoara ka Moea, ke ho utloisia le ho lumela ka pelō ea hao eohle hore Jesu

ke Kreste 'me Lena ke Lentsoe la Hae, hore ha ho mantsoe a mang a ka eketsoang ho Lona kapa a tlosoa ho Lona lebitso la hao le sa hlakoloe Bukeng ea Bophelo. E ne e le thata. Ha u ka eketsa ntho e le 'ngoe ho Lona, ka moetlo oa hao, kapa ua tlosa ntho e le 'ngoe ho Lona, be, Kreste o boletse, ka sebele sa Hae, "Lebitso la hao le tla hlakoloa Bukeng ea Bophelo." Joale, fumana mokhatlo, bolumeli bo hlophiloeng kahara Bibebe. U tla e baleha! Ke hantle. Ho sa tsotelloe nama, thuto ea bolumeli bo hlophiloeng e khahlano le Bibebe. Yaa. Ho *tsoaloa labobeli* ho bolela "Tsoalo e ncha e tsoang Holimo, ho tsoaloa ho tsoa Holimo." Ke hona re bang morolo nqa lintho tse tsoang Holimo. Oh, khili! Hobane Ke Eèna ea sebetsang ka Lentsoe la Hae ka uena, lekala la Hae, ho Morara.

¹⁴¹ Ka baka leo Jesu o itse, "Ha Ke sa etse mesebetsi ea Ntate oa Ka, le se lumele ho 'Na." Oh, ruri bo! O itse, "Ha ho ea kileng a nyolohela Leholimõng haese Ea theohileng Leholimõng." Mo shebelleng ha A hlamela Nikodema lefito mona, mohla Nikodema... Lea tseba, ba ile ba nahana, hore Ke Motho, E ke ke ea eba Molimo. 'Me O itse, 'me mono O itse, "Ha ho ea kileng a nyolohela Leholimõng haese Ea theohileng Leholimõng, e leng Mora motho ea leng Leholimõng hona joale." E ne e mo imela. Ebe A ka ba joalo joang, Mora motho, ea theohileng Leholimõng; ea theohileng Leholimõng; esale eèna ea nyolohetseng Leholimõng; 'me esale Eèna ea emeng mona marulelong a ntlu ena, a ntse a buisana le Nikodema, hona joale a ntse a le Leholimõng? Be, o ne a tlamehile ho bona hore eo e ne e le Molimo. Ke motlalahohle, o hohle! Lea bona? Empa eèna, meetlong ea hae, ha a tseba seo. Mohopolo oa hae e ne e se oa motho oa moea. Kelello ea nama, 'me a sitoa ho e tšoara.

O re, "Ke le Mora motho batho ba re Ke mang?"

"Ba bang ba re, be, 'Ke Mora oa Davida.'"

¹⁴² A re, "Ebe hobaneng Davida Moeeng a Mo bitsa 'Morena,' ha thoe, 'Morena o itse ho Morena oa ka,' "Lula Uena letsohong la Ka le letona, Ke be ke behe lira tsa Hao bonamelo ba maoto"?" Kamoo E leng Motso le Lehlomela la Davida; O tlide pele ho Davida, E ne e le Davida, le kamorao ho Davida. Lea bona? "Ke Motso le Lehlomela la Davida," Bibebe e itsalo, ke Motso le Lehlomela la Davida 'moho. Ebe E ne e ka ba Mora oa Hae joang? Ebe E ne e ka ba Morena oa Hae joang? Bibebe e itse, "Ha ba ka ba hlola ba iteta ho Mo botsa letho ho tloha mohlang oo." Kea kholoa e ne e le ntho e molemo, hape. E, monghali. Ke hantle.

¹⁴³ Ho tsoaloa hape ho tsoa Holimo. Re ba sehlahlo, re ba morolo linthong tse tsoang Holimo, 'me, hobane Bophelo ba Hae bo ahile ka ho rôna, e leng Lentsoe la Hae le nètèfatsang Lentsoe ka Bolona. Moea o ahileng ka ho uena ke Lentsoe le entsoeng nama ka ho uena. Moea o elelloa Lentsoe, 'me o morolo ho nètèfatsa Lentsoe.

¹⁴⁴ Joale, Moea ha o morolo kahara mokhatlo ofe oa bolumeli. Ha o na thahasello ea ho bopa mokhatlo, hobane Moea ka Boona o khahlano le mokhatlo. Mokhatlo o batlana le lintho tsa lefatše, mohopolo oa lefatše, 'me ba haha litempele tse khōlō le lintho tse bentšitsoeng, le mekhatlo e meholo e bentšitsoeng, bareri ba bentšitsoeng, le lintho tse kang tseo, le sehlopha se khabane ka ho fetisisa motseng. Athe, Moea o ntse o leka ho fumana lipelō tse tsepeleng moo Moea o tjantjellang ho bonahatsa le ho pakahatsa hore Lentsoe la Molimo ka leng ke 'Nete. U ka khona joang, ebe Moea o ka sebetsa joang kahara mokhatlo athe o a hanetsa, o nka litumeloana sebakeng sa Lentsoe? E ke ke ea khonahala. Ka baka leo, u a bona, o shoele. Molimo ha o kene libakeng tse kang tseo ho fumana ba Hae, e—e sehlopha sa banna ho Mo sebeletsa, hobane ba se ba shoele. Ke ba sa lumeleng Lentsoe, ho seng joalo ba ka be ba se kahare ka mono. Lea bona? Joale, re morolo ka lintho tse tsoang Holimo. Joale, Moea o ela Lentsoe hloko. Joale, ke hantle, hobane Moea o neha Lentsoe Bophelo. Lea bona? "Letere e a bolaea, Moea o fana ka Bophelo."

¹⁴⁵ Joale, kajeno ha ke nyoloha, ka sheba lifate tse khōlō tse ntle koana morung, maralla a maholo, a masootho, a masehla, a khabile ka meremetala. Ka re, "Lea tseba seo keng?" Ka re, "Re sa hlaheloa ke lefu, 'me Molimo o sa tsoa ntša khare ea Hae, o e hlomme holima maralla. Ke lipalesa tsa lepat. Bophelo bo khutletse lerōleng. Molimo o patile lipeō tsa Hae tsohle tse tsoang lipaleseng le linthong, o boetse o li bolokile, 'me O khabisitse ka lesihla la Hae. O shebile holima lefatše hobane ke lipalesa tsa lepat. Empa ha letsatsi le boela le chaba, peō eo e tla phela hape." Amen. Ke hantle.

¹⁴⁶ Moea o thahasella ho nètefatsa Lentsoe. 'Me haeba u amohetse moetlo sebakeng sa Lentsoe... Joale, u re, "Be, re Le lumela kaofela, empa, Moena Branham, kea tseba hore ha re lumele Sena." Ema hona moo hantle feela.

¹⁴⁷ Moruti oa sesole o kile a mphetela hore o...ha thoe e—e moruti oa sesole o ne a bue, kapa kea kholoa e ne e le majoro, ha thoe, "Moruti, ako tsoele kantle mane, ho na le kapotene ea shoang. O thuntsoe ka machinikane."

¹⁴⁸ Eaba o tsoela teng, 'me kapotene a ntse a loana. Ba mo hulela kahara tente ea Sefapano se Sefubelu, 'me a re, "Kapotene."

¹⁴⁹ A lelala mali a ntse a khakhatsa, 'me a re, "E, monghali." Eaba o re, "Ke uena moruti oa sesole."

"E." A re, "U a shoa, kapotene."

A re, "Kea e tseba."

A re, "Na u Mokreste?"

A re, "Nkile ka ba eëna."

¹⁵⁰ Ho re, "Ebe u Mo siile kae, kapotene?" A re, "U tla Mo fumana hantle moo u Mo siileng teng." Ka nèpo.

Kapotene a re, “Ha ke hopole.”

¹⁵¹ Moruti oa sesole a re, “U mpe u hopole, u saletsoe ke metsotso e ’maloa feela, ho ea kamoo u loanang kateng.” Molomo o bulehile, mali a phutsa molomong le litsebeng tsa hae, ’me a hometsoe ke litholoana tsa machinikane. Ho re, “U mpe u potlake, matšoaf a hao a ntse a tlallana.”

¹⁵² ’Me kapotene a qala a ipotsa, a robetse mono a ntse a loana. Eaba pososelo e relimoloha sefahlehong sa hae, ho re, “Kea tseba joale.”

Ho re, “O Mo siile kae? Qala hantle hona moo.”

¹⁵³ A re, “Joale kea ithoballa.” Ke hona moo a Mo siileng teng, ke hona moo a Mo fumanang teng.

¹⁵⁴ Ha mokhatlo oa hao o ruta ntho e khahlano le Lentsoe, u Mo siea hantle hona moo. Ako khutle hantle, hobane O morolo ho nèpahatsa le ho nètefsatsa Lentsoe leo. Ke seo Jesu a neng a le sona, ho etsa thato ea Ntate kamehla. Lea bona? Ke hantle.

¹⁵⁵ Ka hona, lea bona, kutloisiso ea mokhatlo oa Nikodema e ne e sa bolele letho ho Molimo. Joale, ho sa tsotelle le haeba e ne e le limelala, kamoo re e bitsang, kahara mokhatlo, moholo Iseraeleng, thupello eohle ea hae le kutloisiso e ne e sa bolele hoo [Moena Branham o thanya monoana oa hae—Mong.] mohla a emeng ka pela Kreste, a mpa a mo nyatsa. Joale, kea kholoa batho bohle ba itse, “Ntate ea Halalelang, Nikodema. Ntate ea Halalelang, Nikodema. Rea u khumamela, monghali.” Empa eareha Jesu, mohla a emeng ka pela Molimo, Oa mo nyatsetsa ho hloka temoho ha hae. Ka baka leo, le bona moo hoo hohle ho fellang teng, e lebale! Tloo, ha re eeng ho Molimo. Ke hantle. Ho lokile.

¹⁵⁶ Le kutloisiso e khòlò ea Kore ha ea bolela letho, kapa ea Adama, e ’ngoe le e ’ngoe e latotse Molaetsa oa Molimo o nètefalitsoeng. Joale ha re mameleng ka hloko joale, re tlie kena metsing a phahameng motsotsong. Lea bona, e mong le e mong oa bona, lebaka leo ba keneng mathateng, Nikodema, Kore, Nimrode, le bao ba joalo, ke kahobane ba sa elelloa moromuo oa Molimo ea tšoereng Lentsoe le nètefalitsoeng la letsatsi leo. Joale, mang le mang o tseba seo. Joale, re ka lula nako e telele. Empa ha Molimo o lekanya ’me o bolela taba e tla hlaha; motho o bopa mekhatlo, o lulisa batho ka botsitso. Ba ne ba lumetse ho Messia ea tlang. Oh, Bajuda bao, oh, khile, ehlide! Empa mohla Jesu a fihlang kamoo A tlileng, ba itse, “E ke ke ea eba Eèna.” Ha ba khone ho utloisia Lentsoe. Joale, Jesu ha a tla khahlano le Lentsoe (na O entse joalo?), empa O tlie khahlano le botoloki ba mokhatlo ka Lentsoe. Moshe ha a tla khahlano le Lentsoe, o tlie ho latela Lentsoe hantle; empa Kore o sitiloe ho e bona. ’Me esale ho itšoanelo ho theoha joalo.

¹⁵⁷ Joale shebang. Molaetsa ona oa letsatsi e ke ke ea eba ntho feela e reng “re tšoere ’Nete ’me re tšoere sena, sane,” eka

khona e boleloe pele kahara Lentsoe la Hae! 'Me ka mora hoba Lentsoe le hlahisoe, eka khona le nètefatsoe ke Lentsoe ka botlalo.

¹⁵⁸ Jesu o nètefatsoe ke Molimo ka botlalo, ka Lentsoe. O itse, "Holane le tsebile Moshe, le ka be tsebile letsatsi la Ka." Baporofeta ba Mo boletse hantle, baporofeta bohle ba boletse seo A neng a le sona. Empa koana e ba foufalitse, ba sitiloe ho e utloisia. Lea bona? Empa Jesu o ne a... Joale le se ke...

¹⁵⁹ Ke batla ho bua taba ena molemong oa teipi, le molemong oa lōna, hape. Lea bona, moromuo ka Molaetsa oa letsatsi!

¹⁶⁰ Joale, ha le ka tloha, Masabatha a re, "Re e fumane, le boloke Sabatha feela!" Mpontšeng eona kahara Mangolo. Mof. Eddy Baker o itse o e fumane. Mpontše eona. Lipaki tsa Jehova ba itse ba e fumane. Mpontše eona. Lea bona? Methodise e re ba e fumane. Mpontše eona. Baptise e re ba e fumane. Mpontše eona. Mpontše mekhatlo efe eseles. Ke ntse ke le pakela hore bao, e mong le e mong, o fapohile thato ea Molimo. E 'ngoe le e 'ngoe ea bao e khahlano, e ruta meetlo ea motho litulong tsa Lentsoe la Molimo. Ha ke tsebe ofe oa bbao ea ka amohelang lintho tse ngotsoeng kahara Bibele kamoo E leng kateng. Ke hantle. Empa ha motho a feta a re, "Ke tšoere Molaetsa oa letsatsi," o tlameha ho bonoa pele ka ho hlaka le ho boleloa pele a tla fihla.

¹⁶¹ Mohla Johanne Mokolobetsi a ne a etsoa mono a tsamaea, ba itse, "Na u Kreste?"

A re, "Ha ke eèna."

Ha thoe, "Na—na—na u Elia?"

A re, "Ha ke eèna."

A re, "U mang na?"

¹⁶² O khonne ho itsebisa, o ne a tšoere Molaetsa oa hora. O itse, "Ke lentsoe la ea hoang feelleng, jolokaha moporofeta Esaia boletse. Joale, haeba tsoalo ea ka le bophelo li sa bape le hoo, le se—le se ke la nkamohela."

¹⁶³ Mohla Jesu a ne a fihla, ho ne ho tšoana, ntho e tšoanang. Moromuo ea tšoereng Molaetsa, eka khone e be Molaetsa o lepioloeng ke Molimo pele. 'Me hape Molimo, o buang ka moromuo enoa, o e nèpahatsa e le 'Nete. Lea e utloa na? Lea e utloisia na? E utloisiseng! Pele e tšoanetse ho ba HO RIALO MORENA, e lepioloeng pele. 'Me moromuo ea tšoereng Molaetsa, o tšoanetse ruri ho fetoha seo Molimo a se boletseng se tla etsahala nakong eo.

¹⁶⁴ Le Moshe o ne a le joalo. Ke ka baka leo a itihetseng ka sefahleho sa hae ka pela Molimo, 'me a re, "Molimo, ke Uena ea nthomileng."

A re, "Ikarole sehlopheng seo."

¹⁶⁵ Le bona seo ke se bolelang? Ntho eo esale e sotha mohopolo oa motho, e ba faposa thato ea Molimo. Joale hopolang, e lepiloe pele ke Lentsoe la Hae ebile e nèpahatsoa ruri ke Lentsoe la Hae. Joale, Jesu o itse, "Ha Ke sa etse mesebetsi eo...ea Molimo, le se ke la lumela ho 'Na. Lea bona, haeba Ke fosa...Buang, ke mang oa lōna ea ka Nqosang ka sebe? Ke mang oa lōna ea ka Mpontšang hore Ke mosalumele?"

¹⁶⁶ Nikodema o itse, "Rea tseba U... Rabbi, U tsoa ho Molimo, hoba ha ho ea ka etsang lintho tseo Molimo a se ho eëna." Lea bona? Ka baka leo e Mo supile hore e ne e le molumeli.

¹⁶⁷ Joale, rōna ba tsebang histori ea kereke. Joale khoesang likatiba tsa lōna tsa kelello. Nako ha eso tlole, le joale, lea bona, mamelisang ka hloko joale 'me ke tla leka ho potlaka ka bokhoni ba ka. Ke—ke batla...Le mamelise teipi ka hloko. Joale, mang le mang ea balileng histori ea kereke, o tseba khetlo la pele mohla Bokreste bo hlophisoang le ka mohla, e ne e le kereke ea Roma e Katolike. Joale, haeba mehla e le teng pele ho moo, ke batla motho ea tla ntlisetsa histori a mpontše eona. 'Na ke motsoalle e moholo oa Paul Boyd, borahistori ba bangata ba baholo. Kahara setadi sa ka mono ke tšoere, *Lekhotla La Morao Ho Nicene, Lekhotla La Nicene, Bontate Ba Nicene*, lingoloa tsohle tse halalelang tsa kereke, tseo ke li tsebang. Ke li hlahlobile joale lilemo tse mashome a mararō le metso e merarō, ka li lekolisia. Ha ho eso ka ho boptjoa mokhatlo. Kereke ea Katolike ke 'ma mokhatlo. Hoo re ho tseba e le 'neta. Ha ho kereke e kileng ea hlophisoa, ea hlophisa bolumeli, hofihlela kereke ea Katolike. 'Me lentsoe *katolike* le bolela "e ka lefatšeng lohle." 'Me ba ile ba bopa borapeli ba kereke-'muso, 'me ba bo thea naheng eohle e busoang ke Roma, 'me mohlang e ne e batla e hapile e—e karolo e batsi ea lefatše. E ne e le kereke ea 'muso, 'me ha bolaoa bohle ba hanneng ho ikokobeletsa eona. Lekhotla la Nicaea, matsatsi a leshome le metso e mehlano a ntoa e tšolohang mali, mohla baporofeta ba 'neta ba Molimo, mohla ba neng ba eme mono holima lintho tseo...

¹⁶⁸ Kereke ea Katolike, hobaneng e qalile pele, khele, bohle rea tseba, ke e rutile mona. Kamoo, hantle-ntle, Akila le Prisilla e ne e le moalosi, Akila e ne e le moalosi oa—oa kereke ea Roma. Moea o Halalelang ha o tšoloha ka Pentekosta, o tšolohetse holima Bajuda ba tšoang sechabeng ka seng se tlasa leholimō. Empa matsatsi a se makae ka mora moo, Petrose a bona pono a le marulelong a ntlu, ho ea kopana le Kornele, Moroma, monna ea lokileng, 'me esale a rapela eaba Moea o Halalelang o tšolohela holima hae. Haisa-isa eaba baholo ba qala ba e amohela. Eaba Akila le Prisilla ba kena—ba kena Roma 'me ba hlophisa, kapa, ha ba ka ba hlophisa, empa ba beha kereke ea pele ea Roma ka taolo. 'Me, hoba ba qete, ba fumana baena le likhatseli tsa bona—tsa bona.

¹⁶⁹ 'Me Klaudiase, mehleng ea borena ba hae, o lelekile Bajuda bohole Roma. 'Me ke hona mohla kereke ea Roma e Katolike e tlalehang Petrose a ne a le Roma. Mpontšeng Lengolo le le leng moo Petrose a kileng a kena Roma, kapa histori efe e mo tlalehang joalo. Ha a eso fihle, ho latela Lentsoe la Molimo, etsoe ke lumela Hoo. 'Me na ebe Petrose, oa Mojuda, a ka lumella lisèto le linyee tsa bona, tsa ho rapela melimo ea bohata le lintho? Kae... Lea bona? Mona ebe o khonne joang ho sebetsa khahlano le thuto ea hae? Mepoto. Maprotestanta a hakaalo le oona. Be butleng, re tla kena ho eona hamorao, tsamaong ea nako, ha Morena a ratile. Lemohang. Lemohang joale, rea fumana hore mohla kereke e tlalehang Petrose a le Roma, histori e re Klaudiase (le Bibebe e rialo) o ne a laetse Bajuda bohole ho tsoa Roma.

¹⁷⁰ 'Me eaba Pauluse o haola le Efese a fihla libakeng tse holimo tseo, a fihlela barutuo a bana, 'me teng a etetse ha Akila le Prisilla. Ka mora ho tsamaea ha bona, ke mohla baena ba Maroma ba kahara kereke ena ba qalang ba itlhomela mehopoloana ea bona, ba sotetsa tšebeletso ea lisèto. 'Me ho boele ho be le Konstantine, 'maè e ne e le Mokreste oa sebele 'me a tsepile hore moshanyana oa hae o tla ba joalo, empa e ne e le ralipolotiki. 'Me o bone boholo ba Roma, kapa karolo e khôlô ea eona, ea sehlopha sa bafutsana, e se e amohetse pholoso ka Kreste. Eaba ba qala ba tuma haholo, kaha ba ne ba theola Venuse 'me ba nyolla Maria, 'me ba theola Jupiter ba nyolla Petrose, le lintho tse kang tseo le—le barutuo, ea eba borapeli bo tummeng. 'Me e le bahale. Bao, Bakreste bao ba ne ba eshoa!

¹⁷¹ 'Me kereke ea Katolike e itse, "Ke rôna qalo." Ke 'nete e tiileng, kereke ea Katoloke e qalile ka Letsatsi la Pentekosta. Empa ntho e ba ntšitseng ke ena, e ile ea hlaphisa 'me ea sotetsa (ho tsoa Lentsoeng) lihlomathiso. 'Me sehlomathiso sa morao-rao, lôna batho ba tlotseng lilemo tse leshome le ka hopola sehlomathiso sa morao-rao, nyolohelo ea Maria, lilemo tse ka bang leshome tse fetileng. Ho ekelitsoe sehlomathiso se seng kerekeng. Sebakeng sa Lengolo, ke sehlomathiso! Ba tla u joetsa hona joale, bona, "ha ba tsotelle seo Lengolo le se buang, ke seo kereke e se buang."

Bao, moprista o mpoleletse, ho re, "Molimo o kahara kereke ea Hae."

Ka re, "Molimo o Lentsoeng la Hae."

¹⁷² A re, "Be, Bibebe e mpa e le histori ea kereke ea pele ea Katolike."

¹⁷³ Ka re, "E tla ba 'na ba ke Mokatolike oa sethathong." Ka re, "Haeba ho le joalo 'na ke Mokatolike ea u fetang, uena u leng moprista." Lea bona? Ka re, "Haeba e le eona, e tla ba 'na ke eona." Ka re, "U a bona, ke lumela hantle se rutiloeng

ke baapostola. Lōna le lumela seo monna a se sotelitsoeng ho eona.” ’Me ehlide e tsamaile joalo. Ehlide, e ne e le eona. E tsamaile joalo, hantle ka mokhoa oo.

¹⁷⁴ Joale le elelloe histori. Eaba ba qala ba sotetsa lihlomathiso, sehlomathiso. ’Me eare ha Pauluse a fihla, rea tseba, ho latela histori, ha a ka a etela kereke eo ea pele, kaha a ne a sitoa ho mamella tšebeletso ea melimo ea bohata. ’Me eaba o etela kereke ea bobeli eo ba e theileng, kereke ea bobeli ea Roma.

¹⁷⁵ ’Me eitseha Lekhotla leo la Nicaea le fihla, ke hona mohla Konstantine a ne a bona monyetla oa ho kopanya ’muso oa hae. Eona ntho eo Akabe a e entseng ka Jesebele, ka ho nyala tlase mono. Lea bona? ’Me eitseha ha a bona monyetla oa ho kopanya batho ba hae ho bopa sechaba se matla se seholo ka lona, a hopola ba tla tšoara borapeli ba bona, eaba o ba etseta borapeli ba kereke-’muso. ’Me mohla Lekhotla la Nicaea, ’me ho hlaha lipotso tse mabapi le Molimo o le mong, kapa e merarō; ba tlameha ho kolobetsa ka Lebitso la Jesu Kreste, kapa Ntate, Mora le Moea o Halalelang; lipotso tsena tsohle tsa hlahisoa ho—ho makhaolakhang kahare ka mono. ’Me, hoba ho etsoe, ba bang ba baporofeta bao ba khale ba itlama ka letho letho haese letlalo la nku, ba ejia meroho e babang. Hantle! Empa keha batlotlehi ba baholo bao ba se ba khukhunetse kahara kereke, ba ba khutsisa ka bohlale ba lefatše. Empa ba ne ba tšoere HO RIALO MORENA. Eaba e kena lefifing la tšebeletso ea lefifi la bopagane lilemo tse batlileng ho ba sekete.

¹⁷⁶ Empa ea boela ea ropoha, ea thunya. Ke hantle. U ke ke ua E bolaea. “Ke tla khutlisetsa, ho bolela Morena, lilemo tsohle tse jeloeng ke lintho tsena.”

¹⁷⁷ Mekhatlo ea malumeli e sotelitse sehlomathiso. ’Me ho finyella sena, ho eketsa sehlomathiso, mokhoa o le mong oo kereke efe, mokhoa o le mong oo mokhatlo ofe oa bolumeli o ka suthang Lentsoeng la Molimo, ke ka ho eketsa sehlomathiso sebakeng Mangolo a khetheleng, ke ho leka ho hloma moetlo oa hao kapa thuto ea kereke ea hao, leha koana e le khahlanlo le Mangolo. Ebe le ka nyatsa kereke ea Katolike joang, athe le etsa seo ba se entseng? Lea utloisia? Ho lokile. Athe, joale lea nahana, Mangolo a ke ke a hloleha! Sehlomathiso ke leshano, le ho qaleng. ’Me ha u amohela mokhatlo oa bolumeli, u se u amohetse sehlomathiso, hobane e ekelitse ho hong. Ha e fumanoe kahara Lengolo. Ha e fumanoe kahara Lengolo.

¹⁷⁸ Ha ho ntho e kang mokhatlo. Jesu ha a eso re, “Ke le roma ho ea ka lefatše lohle, le bope mokhatlo.” Che, monghali, ha ho ntho e joalo! Ho etsa sena, ke ho latola Mangolo a khetheleng. Hoba sena se etsoe, ea fetoloa ho tsoa ho “Kereke ka tsoalo” ho ea ho “kereke ka sehlomathiso le ka tumeloana.” Ha se *kereke*, ke kopa tšoarello; loje! U tsoalloa kahara Kereke, empa u ingolisa le loje. Hase kereke ea Baptise,

kereke ea Methodise, kereke ea Pentekosta. Ke loje ea Baptise, loje ea Pentekosta, le loje ea Methodise, u ingolisa ho tsona. U ke ke ua ingolisa Kerekeng. Ha ho ntho e joalo. U tsoalloa kahara Eona. Nikodema o boleletsoe eona ntho eo. Ka baka leo na u bona moo u leng teng? Oh, khili!

¹⁷⁹ Ke khahlano le oona ka lebaka leo. Hase khahlano le batho ba kahara oona; ke khahlano le tsamaiso. Hobane ha ba khone... E mong oa baholo bao kapa ntho e itseng, haeba kereke e 'ngoe ea tsona e rera ntho e kahara Bibele e khahlano le thuto eo, molaotheo oa kereke eo, o khaoloa joalo feela. E, monghali. Ba bang ba bona ba sehloho hoo ba sa lumelleng tsooseletso ho kena kereke e 'ngoe ha e sa tlisoe ke e mong oa banna ba bona. Khele, ba fetohile tjena...

¹⁸⁰ Mohla motho e mong tla neha moreri... Hantle mona naheng ena, moreri oa khale e monyenyanee ea emeng mona seterateng, a lla 'me a qeka pako, 'me a re, "Tloong, le amohele Kreste, le tlatsoe ka Moea o Halalelang," le lintho tse kang tseo. 'Me eaba monna e mong oa mokhatlo oa Pentekosta o nyoloha a nehela monna dolara matsohong a hae, 'me keha a tlameha ho baka kahobane a febile khahlano le kereke ea hae. Le bua ka Katolike! Ke hantle. 'Me lea tseba na ke bua hokae, hape; kapa kereke ena e etsa joalo, le hona. Ke hantle.

¹⁸¹ Ka ho etsa sena, ka ho hana Mangolo, mohla sena se etsoang, ea fetoha mohla u eketsang sehlomathiso 'me u ingolisa le mokhatlo, u se u amohetse sehlomathiso sa hao sa pele, hobane ha se lumelane le Lengolo, ka hona ke ntho e ekelelitsoeng. 'Me sehlomathiso ke ntho e ekelitsoeng, "ho tlatsa sebaka sa ho hong," ke ho tlatsa sebaka sa tsoalo. Ha u amohela mokhatlo oa bolumeli, u se u ekelitse sehlomathiso. Ke hantle. 'Me sena ha se etsoa, e fetoloa ho tsoa ho "Kereke ka tsoalo" ho ea ho "loje ka sehlomathiso kapa tumeloana." Hoba, u a bona, ke sehlomathiso ka bo-sona, ha sea tsepama le Lengolo.

¹⁸² Joale, Jesu ha a eso re, "E-eang ka lefatše lohle le etse mekhatio ea malumeli, e-eang le hlophise batho hammoho." O itse, "E-eang le etse barutuo." Lea e lumela? [Phutheho e re, "Amen."—Mong.] Amen. Ka hona, u a bona, u fapohile ka botlalo.

¹⁸³ Mamela, u shebe mona. Ha re e koaleng ka ntho e 'ngoe mona, ho e sothella ka thata hantle mona nakong ea joale. Ba tšoereng tlotlontsoe ea Segerike ba bakae, eona Emphatic Diaglott ea lingoloa tsa sekhaleng, Segerike? Ke hantle. E baleng, le fumane moithuti ofe oa sekolo eo le mo batlang. Kenang laeborari le fumane tlotlontsoe, tlotlontsoe ea Segerike. Balang Tšenolo 17, 'me ha u bala mono, Phetolelo ea King James mona e re, 'me taba ena, "Eaba o nkuka ka Moea; 'me ka bona mosali ea lutseng holima sebata se 'mala oa sekarelata, se tletse e—e mabitso a bonyefoli." Joale, ke seo King James e se buileng. Empa phetolelo ea mantlha e itse:

*... nkuka ka moea ... 'me ka bona mosali ... a tletse
mabitso a nyefolang, ...*

¹⁸⁴ Phapang e khôlô lipakeng tsa “mabitso a bonyefoli” le “mabitso a nyefolang.” Joale sheba. Bohle rea utloisia ‘me re tseba e ne e le kereke ea Roma e lutseng holima maralla a supileng, e laola matla a lefatše. ‘Me a bitsoa “seotsoa,” ‘me e le “ma lihlola.” Sheba! Sehlola keng? Na e ka ba monna? E tlamehile e be e le mosali. Haeba e le mosali, e tlamehile e be e le kereke; e ne e le ‘ma lihlola, a itšoanel a le eèna. ‘Me bona, sheba, “Ka ho eèna!” E re e thophothele. “Ka ho eèna ho tletse mabitso a nyefolang.” Ke eng? Joale, bareri mona le teiping, khutsang le re tu hleng. Mabitso a nyefolang ao keng? Methodise, Baptise, Presbeteriene, Luthere, Mapentekosta, le tse joalo. Mabitso a nyefolang, hobane ke mekhatlo, bohlola ho Molimo, joaloka eèna feela mohlang oo.

¹⁸⁵ ‘Me bao, kahara lihlopha tseo, batho ba re, “Khele, ke Methodise, ‘me o etsa *sena*. Ke Pentekosta, ‘me o etsa *sena*. Ke Presbeteriene, ‘me o etsa *sena*.” Ba etsa ntho eohle kahara k’halendara, le tseba seo. ‘Me ke eng? Ke mabitso a tlamehileng a be a tšoana le Kreste ‘me ba reeletsoe ka lebitso la Bokreste, ‘me ke mabitso a nyefolang! Tseo hase likereke. Li bitsoa “kereke” ka phoso. Ke liloje! Joale na lea bona hobaneng ke le khahlano le mokhatlo, e seng batho? Tsamaiso ea mokhatlo, lea bona, mabitso, mabitso a nyefolang (shebang) a liloje, tse bitsoang likereke ka phoso. Kereke ea Methodise, kereke ea Baptise, kereke ea Presbeteriene, kereke ea Pentekosta, kereke ea Luthere, kereke ea United Brethren, ha ho ntho e joalo. Ha e kheme le lengolo.

¹⁸⁶ Kereke e ’ngoe feela, ‘me u ke ke ua ingolisa ho Eona. U tsoalloa ka ho Eona. U ne u rereloe ho Eona pele. ‘Mele oa Jesu Kreste oa khopolo... ‘Mele oa sephiri, ke rialo, oa Jesu Kreste mona holima lefatše, ka Lentsoe le bonahatsoang. Bara le barali ba Molimo, hase litho tsa ofe hara eona. “Tsoang ho eèna,” A rialo. Yaa.

¹⁸⁷ Shebang, ka potlako joale. Ha ke batle ho le khathatsa, empa ha le ka mphä metsotso e ‘maloa hape joale, ke tla feta ka potlako ea bokhoni ba ka, empa ke batla le kholisehe ho e tsoara, le se e fose. Lea bona?

¹⁸⁸ Hopolang, ‘mè Roma, ka ho eèna, ho fumanoe a tletse mabitso a nyefolang, ‘ma lihlola. Hape, haeba e le lihlola, sehlola keng? Seotsoa keng? Se itšoanel a le sehlola. Ke mosali ea phelang a hloka botšepehi likanong tsa lenyalo la hae. ‘Me kereke efe e ipitsang Kereke ea Kreste, ‘me e hana Lentsoe la Molimo, ha e tsepahale likanong tsa lenyalo la eona! Ka hona e feba ka ho sutela sehlomathiso, ho feba le lefatše le bohlale ba lona, ho ena le ho amohela Kreste le matla a tsoho ea Hae ka Moea o Halalelang. ‘Me ke ‘ma lihlola tse entseng eona

ntho eo. Pitsa e ke ke re ketlele e “mosili,” u a tseba; lea bona, ke mokopu, o patsotsoeng ka lehare. Batho ba bang bana ba matha hohle ba iqabola ka Katolike, athe ke litho tsa eona ntho eo ka bobona. E ne e le ’ma kolobetso ea bohata kahara metsi. Ke ’ma bopaki ba bohata ba Moea o Halalelang, ’me lōna le mo latetse hantle feela. Joale ha re boneng.

¹⁸⁹ “Na ke ’nete, Moena Branham?” Ako khutse u re tu nakoana feela.

¹⁹⁰ Lea bona, ke ’ma mabitso a nyefolang, oa liloje tseo batho ba ingolisitseng le tsona, ’me ba lihela sekhobo, ba iphelela ka mokhoa ofe, ho tena lishotso, basali ba pomme moriri, ba ferefiloe, ba bina lik’hoaereng, ba tsuba lisakrete, ba ja selallo, litšila tsohle tsa lefatše, ’me ke lejoe le khopang mosalumele. Na Timothea ha e bolela, Moea o Halalelang? Shebang. Lea bona, èèna, Roma, ke ’ma e ’ngoe le e ’ngoe ea tsona. Lea bona? Le mo etsisitse hantle kaharamekhatlo ea lōna, ho sutela lihlomathiso sebakeng sa Lentsoe, hobane sehlopha sa banna se e hlophisitse ’moho, balaoli ba selika le libishopo le ba joalo ba e tlailehile *tjena*, ’me ke sona hantle se etsahetseng Roma. ’Me ako leke, molisa moena uesō, ho amohela Lentsoe la Molimo ka bottlalo, ’me, u shebe moo u tla fellateng, u tla tsoa hantle monyako! Joale re tla bona haeba Molimo a u laetse joalo, kapa che, metsotsong e ’maloa. Lea bona? Ke hantle.

¹⁹¹ Lea bona, ke ’ma e ’ngoe le e ’ngoe, kaha e le oa pele ho falatsa lingoloa tsa Lengolo le ho eketsa sehlomathiso, hobane o hanne baporofeta ba nèpahalitsoeng ba phetseng bophelo bo nètetalitsoeng, ka Lentsoe. Hlalefo ea bona, monna ea masene, Babusisi ba Roma, le ba joalo, ba neng ba amohetse Bokreste, empa ho batla... ho bo amohela ka tsela ea bona. Lea bona? Ke hantle. Ba bo batla ka tsela ea bona.

¹⁹² Naamane o ne a batlile ho phekola lepera la hae metsing a naha ea habo, a sa batle metsi a lukehileng a Jordane. Empa ho felisa lepera la hae, a tlameha ho kena hara seretse seo ka taelo ea moporofeta. Lea bona, Molimo ha o hlomphe motho.

¹⁹³ Lemohang, ke mokhatlo oa pele oa bolumeli. Shebang barali ba hae, ba entse hona hoo, ba sutetse litumeloana le lihlomathiso bakeng sa Lentsoe. Le se mpolelle; mpontšeng e sa Le fapohang. Mpontše molisa ea tla amohela ’Nete, ba sa tlo u lelekela kantle ho eona, ntle leha u tumme, u a tseba, ba tlamehile ho itšoarella ka uena ka baka la botumo ba hao kapa ho hong. Ke hantle haholo.

¹⁹⁴ Joale sheba Tšenolo 18, metsotsa e ’maloa feela, temana e latelang ka koana, khaolo e latelang, ka mora hoba Tšenolo 17 e hlahlobe ’me—’me e bontše sephiri sa Mofn. Babilona enoa. Khaolo ea 17 ea Tšenolo e mo hlalosa e le kereke e lutseng holima maralla a supileng, Motse oa Vatican, o busang marena ohle a lefatše (ke eona hantle feela), le tsona Lipresidente, le

ba joalo. Uh-huh. Ka hona, empa ke eo mono, o tšoere leruo la lefatše letsohong la hae. Ke hantle haholo. “Ke mang ea ka loanang le eèna?” Ke hantle. Bohle re tseba seo. Empa hobaneng le iketsa setho sa ntho e amanang le eèna? Joale lemoha khaolong ea 18, khaolo e latelang hoba sephiri sa hae se hlalosoe. “Ho lula tempeleng ea Molimo.” Joale, mona, eona . . .

¹⁹⁵ Zella Braitman, u teng bosius bona, Zella? O tlisitse, ntho eo e ka phaposing mono hona joale, *Moeti Oa Rôna Oa Sontaha*, pampiri ea Katolike. ‘Me pampiri ea Katolike e arabile moreri e mong. Ho itsoe, “Na u itse, mohlomphehi, hore hoo ho . . . Ka litlhaku tsa Seroma holima Vatican, kapa holima terone ea Mopapa, ho ngotsoe, ‘Vicariis Filli Dei,’ eona e bolelang, ho diosesea ea Katolike mono, hore eo ke—ke palo ea sebata sa Apokalipse?”

¹⁹⁶ “Khele,” a re, “ehlile, ke eona. Hantle bo, e peleta makholo a tšeletseng le mashome a tšeletseng a metso e tšeletseng. Ke eona hantle.” ‘Me diosesea ea Roma e a e lumela, hore e etsa joalo. Empa karabo ea bona ke ena, masene, ba tletse bohlale, ho itsoe, “Empa, u a tseba, lebitso la hao ka puo e ’ngoe le ka ’na la peleta eona ntho eo.”

¹⁹⁷ Monna enoa o itse, “La ka, le batla le itšoanelia le eona ka puo e ’ngoe.” Eaba o a le peleta. Ha thoe, “U a bona, ke batla ke etsa makholo a tšeletseng le mashome a tšeletseng a metso e tšeletseng, le ’na.” Ho re, “Ho bile le makholo a bona.” Ho re, “Nako le nako ha ntho e hlaha, motho e mong o etsa makholo a tšeletseng le mashome a tšeletseng a metso e tšeletseng.” Le ho re, “Mohlomphehi, na u tsebile hoba ka puo e ’ngoe lebitso la hao le ka peleta antikreste?” Ho re, “Hobaneng u sheba lintho tse joalo?” Le shebe bohlale boo.

¹⁹⁸ Empa Moea o Halalelang o tseba hantle ho feta. Shebang. Ho ka ba joalo, lebitso la ka le ka peleta makholo a tšeletseng le mashome a tšeletseng a metso e tšeletseng, empa litšobotsi tse ling tsohle ha li ntékane. Ha kea lula holima leralla. Ha ke bue lintho tse ling *tsena*. Ha ke mogofonoro, u a bona. Ke hantle. Ke eèna ea eo A buang ka eèna. Ka baka leo bohlale ba hao ba lefatše ha bo bolele letho, monghali, ke hantle, ka pela Sefahleho sa Moea o Halalelang. Litšobotsi tse ling ha li ntšoanele, empa eèna. “Ho lula tempeleng ea Molimo, a ipontša e le Molimo, ‘me o lutse holima maralla supileng.” Ha kea lula holima maralla supileng, leha koana le peletoa makholo a tšeletseng le mashome a tšeletseng a metso e tšeletseng. Litšobotsi tse ling ha li ntšoanele, empa eèna. Lea bona, ke lôna bao. Lea bona? Itsetlehe ka Moea o Halalelang feela, “Le se nahane seo le tla se bua, hobane ha se lôna ba buang; ke Ntate.”

¹⁹⁹ Ka baka leo ebe bohlale ba hao le Tsoalo ea hao e ncha e tsoang Holimo e ka ipapisia joang le lintho tsena tsa lefatše mona, maselamose ana—ana a maholo? Khele, ba tseba

thupanyana eohle le sekhutlo. Moshe o khonne joang ho ema athe o ne a setse Melao ea Molimo morao, a lahlela molamu oa hae fatše oa fetoha noha, eaba mona ho fihla maselamose a etsa joalo? Empa Moshe a ema, a tseba hoba o latetse Lentsoe la Molimo, eaba moo noha ea hae e jang tse ling tshole. Lea bona? Ka hona haeba o mametse 'me o tšoere... O ne a ka etsang mohla a ba isitseng lefatšeng la pallo, 'me ba thibelloa ke Leoatle le Lefubelu, empa tsela ea Molimo e feta hara lona. Amen. Ho re, "Emang, 'me le bone Khanya ea Molimo!"

²⁰⁰ Ha e le tseleng ea kutlo, ho sala Lentsoe morao, ema mono u le shebe ha le buleha. Amen. Lilemo tsa ka li mashome a mahlano a metso e merarō, esale ke Mo sebeletsa lilemo tse batlileng ho ba mashome a mararō a metso e merarō, ea ka nka fuoa lilemo tse limilione tse leshome ho Mo sebeletsa. Ha ke eso 'Mone a hholeha le joale, ha Lentsoe la Hae le bolokoa. Ke hantle.

²⁰¹ Joale shebang, hang ka mora sebe sa hae, liphiri tsa hae li utulotsoe. Re kile ra tšoarana le eona khale koana, rea e tseba.

²⁰² Joale khaolo e latelang, shebang Tšenolo 18. 'Na nka e phetla motsotsa feela. Ekaba ntho e molemo, e tla re nka metsotsa e 'maloa feela, 'me e ka bolela nthoana e itseng ho uena. Ke tšepile joalo.

²⁰³ Joale mona rea bona, khaolong ea 17, temana ea 5.

...ho ngoliloe phat leng ea hae lebitso le reng,
*SEPHIRI, BABILONA E MOHOLO, 'MA LIOTSOA,
LE A MANYALA A LEFATŠE.*

'Me shebang.

'Me ka bona mosali eo (kereke) a tahiloe ke mali a bahalaleli, le ke mali a lipaki tsa Jesu:...ka makala ka makalo e khōlō, ha ke 'mona.

²⁰⁴ Lea bona, lea 'mona, e le ntho e khōlō e ntle hakalo. 'Me e le 'ma liotsoa, borapeli ba liotsoa, mekhatlo ea malumeli, ke sona seo a se entseng, lea bona, hobane ba sotelitse lihlomathiso joaloka eèna. Joale shebang, shebang Tšenolo joale, eo ke khaolo ea 17, e qetella ka temana ea 18. Joale shebang.

...ka morao tseo, hoba sephiri sa hae pepesoe,
ka mora tseo ka bona lengelo le leng le theoha
leholimōng, le ena le matla a maholo;...

²⁰⁵ Joale, moromuo a mong ke enoa a theoha, khaolong e hlahlamang, sephiri sa hae se pepesitsoe. Joale, mona ho pepesoa joale sephiri sa hae le sephiri sa bana ba hae. Lea bona, joale re utloisia hantle se mo fetotseng sehlola: hobane o febile khahlano le Lentsoe la Molimo. 'Me ke sona se mo entseng mokhatlo. Ha a khona ho lula e le kereke ea Bibebe le ho amohela seo. Le mokhatlo ka mong o sa amoheleng Lentsoe le leng le le leng la Eona o ke ke oa khona (kamoo Le ngolioeng) e ke ke ea eba kereke ea Bibebe. 'Me e 'ngoe e

joalo ha e fumanoe, eo ke e tsebang, ha ho le e 'ngoe. Ka baka leo mono, lea bona, hang ha e hlophisa lintho tseo e li etsang, (ka Lengolo le ka kholiso) e shoella hona moo, e amohela sehlomathiso. Joale shebang, joale ke sona se etsahetseng.

²⁰⁶ Molimo o rometse, khaolong ena ea 18, lengeloi le matla, ka mora hoba sephiri seo se tsebisoe, lengeloi le matla, kapa, moromuo. Shebang mona.

...ka mora tseo ka bona lengeloi le le leng le theoha leholimōng, le ruile matla a maholo; 'me lefatše la bonesoa ke khanya ea hae.

La hooa...ka lentsoe le phahameng,...Babilona (pherekano) e moholo o a oa,...'me o fetohile moaho oa batemona,...letsaba la meea eohle e litšila, letsaba la linonyana tsohle tse hloekileng le tse ilang...tse sa hloekang tse iloang.

Le hobane lichaba tsohle li noele veine ea bohale ba maotsoa a hae, 'me marena a lefatše...a febane le eèna, 'me bahoebi ba lefatše ba se ba enne ka boholo ba lesupi la hae.

²⁰⁷ Shebang, hang hoba sephiri sa hae se pepesoe, hore e ne e le mang, seo a neng a le sona, barali ba sona e ne e le bomang, sephiri se ne se pepesitsoe, eaba Molimo o romela lengeloi, moromuo ho (etsang?) hlabela mokhos. "Tsoang!" Molaetsa oa hora!

...Tsoang ho eèna, lōna batho ba ka, le se kenelle likotsi tsa hae...

O tlil'o mo rohaka. Shebang.

²⁰⁸ Tsoang ho eèna! Molimo o rometse ba bangata...lengeloi le matla, kapa, moromuo. 'Me Leseli la hae le ne le sa chaba k'honeng, Le ne le bonesitse lefatše lohle. Tsoang ho eèna! Eng? Eèna, le likhaiseli, tsa hae. Ho bonesa lefatše, le ho hlabela batho ba Hae mokhos ho tsoa ho eèna. Joale, lea tseba hoo ke 'Nete. Moromuo o ronngoe a tsoa Leholidmōng, ho hlabela batho ba Molimo mokhos ho tsoa Babilona. 'Me Leseli la lona la bonesa lefatše, Moea o Halalelang o moholo.

²⁰⁹ Lemohang, Bibele e itse, "Ke letsaba, 'me le hlahletse linonyana tse iloang, tse sa hloekang." E seng lintsu, joale, che, che, che, che. Manōng, "linonyana tse sa hloekang, tse iloang," o teetsoe hare ke letsaba le joalo. Letsaba la hae le tletse tsona, letsaba le tletseng tsoete. Ho tlala eng? "Mabitso a nyefolang," a khahlano le Lengolo. Timothea oa Bobeli 3 e boletse, ke Moea o Halalelang o buang, "Mehleng ea bofelo ba tla koenehela Tumelo 'me ba mamele meea e thetsang." E boetse e itse, Moea o Halalelang o itsalo "Matsatsing a bofelo e tla ba bakaki, baikakasi, ba iloang ('Ho bokoe Molimo, u setho sa rōna, kapa ha lebitso la hao le sa ngoloa bukeng ea

rōna, u lahlehile'). Ba iloang! Ba sa hloekang!" Kea t̄sepa hore ha ke utloise bohlоко, ke t̄sepa ke etsa molemo. Linonyana tse iloang, tse sa hloekang, o li hlahletse letsabeng.

²¹⁰ Hopolang, Molimo ke ntsu. O Ipitsitse ntsu. 'Me O bitsitse Jakobo ntsu. 'Me rōna re litsuanyana tsa Hae ntsu. Amen. O bitsitse baporofeta ba Hae "lintsu." 'Me lengeloi lena le theoha ho pepesa le ho hlaba mokhosi ho tsoa!

²¹¹ Joaloka molaetsa oa ka o monyenyanе oa *Ha Ntsu E Oka-okela Sehlaha Sa Eona*. Esale ntsu eo ea khale e nyenyane setse sethole seo sa khale sa khoho morao kahara setša sa jarete ka linako tsohle, se ntse se kakatletsa hohle, empa keha e sa khone ho ja nyee ea hae, lintho tsa botho, le basali ba ferefiloeng, moriri o ponngoeng, le lishotso. E sa khone ho etsa joalo. Empa koana e sa tsebe letho haese ho kakatletsa ha sethole seo sa khale. Empa 'mè ntsu a e fumana ka tsatsi le leng. A hlaba mokhosi, ho 'miletса kantle, ho re, "Mora, ha o e mong oa bona. Tsoa ho eèna!"

Ho re, "Mama, ebe nka etsang?"

²¹² Ho re, "Tsokotsa mapheo a hao u qale." Ea qhoma la pele, ea thula palо, ea oela hantle kahara mokhatlo. Ha thoe, "Mora, u tla tlameha ho nyolohela holingoana ho feta moo ho seng joalo nka sitoa ho u nanabela. U tlameha ho tlosa maoto a hao fatše." U tliro mo fofisetsa holimo. Ea iphumana e khona ho fofa. O tlije ka morero oa ho 'miletса kantle. Ke hantle.

²¹³ Empa 'Mè Babilona enoa o itšoaretse sehlopha sa litsuonyana, litsuonyana tse bohlajana, tse ferefiloeng, tse pomeng moriri, tse ipitsang "Bakreste." O li tlatsitse letsaba. Löna bareri ba emang sefaleng le lumella basali bao ho e phema, ha le soabe, ho holisa mokhatlo oa löna oa bolumeli. Molimo o tla e botsa letsohong la hao. Tsoa ho eona! "Linku tsa Ka li utloa Puo ea Ka." Letsaba la tse iloang, la bakaki, baikakasi, ba ratang monate oa lefatše ho feta ba ratang Molimo, ba ka mpa ba ipapisa le lefatše ho ena le ho tšoana le Kreste. Ha u bona mosali ea inetileng ka meikapo, ke bopaki ba hore o lehlaha le kahare. O bohata kahare. Ke hantle haholo. Haeba mosali... Ke bone e mong tsatsi le leng, ka moriri o motala, ke hantle, ka nyee eo eohle e tala kahara mahlo a bona.

²¹⁴ Joale, haeba u—haeba—haeba u se na moriri, 'me—'me u batla ho roala moriri o itseng, ho ka itokela, empa, roala o tšoanelang motho. 'Me hola u se na manala, 'me—'me u batla manala a monoana, se nke tse tšoanang likhakhetla tsa linaoa tsa sesole sa metsing, fumana—fumana manala a 'nete. Ha u se na lintho tsena, ho itoketse. Ha u se na meno, iphumanele a mang haeba ba ka u etsetsa oona, iphumanele oona. Empa u se ke ua ntša ao Molimo a u neileng oona kaha a batla a pelekane, 'me koana ke meno a thata, ho fumana a mang. U se

ke ua fetola 'mala oa moriri oa hao, kapa ntho e itseng, 'me u tšoane le ntho e tsoang qhefe-qhefeng e itseng. U se ke! Ha u se na 'mala, 'me u batla ho loisa 'mala oa oona, ho itoketse, kea kholoa. Empa se iketse mokana u le Jesebele, u tšoana le sekiri se ntseng se ferefuo a kae-kae.

²¹⁵ 'Me lōna baena ba Pentekosta, le lumellang basali bao ho kuta moriri oa bona, athe Bibele e itse ke khanya ea hae! Ebile ke lihlong ha mosali a rapela ka moriri o joalo. Ebe le mo lumella ho hloa sefala le ho rera Evangel, ho bina k'hoarereng, ho ruta sekolo sa Sontaha. Lihlong! Le tlameha ho itšoabela. Hobaneng ke le khahlano le mokhatlo? Le nahana hore nka tšehtesa ntho e joalo? Moena, kea tseba hobaneng u e etsa. U tseba hantle, empa ha u ka ruta khahlano le eona, u tla kharameletsoa lintlukhōlō, 'me ba tla u khaola. Molimo a u hlohonolofaletse sebete sa hao haeba u ka etsa joalo. Ke hantle. Molimo o tla u hlompha.

²¹⁶ Lengeloi lee le itseng? "Tsoang ho eèna!" E, monghali. Lengeloi lena le tlie lefatšeng, 'me tlisitse Leseli, 'me le khantsitse lefatše lohle ka Leseli. E ne e le lengeloi le matla. 'Me le tlie le tumisa molaetsa o reng "Tsoang Babilona! Le se ke la ama lisila tsa hae!"

²¹⁷ Ke letsaba le tletseng tsona, ho itsoe, "Ke letsaba la nonyana tsohle tse iloang." Yaa, hona joale o li tlatsitse letsaba, Mokhatlo oa Likereke tsa Lefatše, kapa liloje. Hono joale o lhahletse mphi eo, bohle ba kopana. O fetohile letsaba, ke hantle, le tletseng linonyana tse iloang. Ke hantle. Ako leke ho bua le e mong oa bona khetlo le leng, ako leke feela, moshaana, ba masene a lefatše, empa a sa tsebe letho ka Molimo sa pela e sa tsebeng letho ka lieta tsa lehloa. Ke hantle. Feel a, ke eona feela hantle, lea bona, ba mpa ba itsebela bohlale bo itseng ba ho sunya *sena* le ho etsa *sane* ka mono. Empa ha ho fihloa tabeng ea ho Mo tseba? Huh! Yaa, ho tšoaso a kahara letsaba la hae ka lihloamathiso tsa hae. Likereke tsa protestanta li qalile eona ntho eo, li fetohile barali ba hae, ba e entse ka ho latola Lentsoe la Molimo. E etsa seo. E latola Lentsoe. 'Me ha u amohela ntho e hosele le Lentsoe, u Le latola ka bo-uena. 'Me ha u ingolisa le e 'ngoe ea tsona, le uena u se u latotse Lentsoe. Molimo ha u batle u le joalo, ha e na malulo kahara Lengolo.

²¹⁸ Lemohang, lena ke lengeloi la Leseli, hopolang, lengeloi la ho qetela, ke lengeloi la mongoaha oa kereke ho Laodisea. Ke moromuo a Laodisea, hoo, ke la ho qetela, hobane eona khaolo e latelang ke khaolo ea 19, e leng Monyaluo a tlang. 'Me ntho ena, kahara Lengolo, ke lengeloi la ho qetela le tlileng ho khantsa Leseli pele Monyaluo a fihla ho ea kopana le Kreste. E ne e le Mongoaha oa Kereke ea Laodisea, ke hona. Moromuo a Mongoaha oa Kereke ea Laodisea e ne e

le eng? Ho ba biletса kantle ho Babilona! Shebang! Likereke li tšoasitsoe le eèna kahara letsaba la hae, ka lihlomathiso tsa hae, li latola Lentsoe 'me li amohela lihlomathiso. Lena ke lengeloи la Leseli ho kereke ea Laodisea e neng e latotse Kreste le Lentsoe la Hae, bakeng sa sehlomathiso, 'me ba Montšelitse kantle. 'Me O ne a eme monyako, a kokota, a leka ho kena kahare. [Moena Branham o kokota sefaleng—Mong.] Lea bona? Mongoaha oa kereke o ne o latotse Kreste, 'me Kreste ke Lentsoe, 'me o ne o Le latotse, 'me O ne a eme kantle. Ke ona feela mongoaha oa kereke oo re fumaneng Kreste a eme kantle, a ntse a kokota, a leka ho kena kahare. [Moena Branham o kokota sefaleng.] 'Me Molaetsa oa lengeloи lena, moromuoа o tsoa ho Molimo, o ne a hlabo mokhosi oa Molaetsa oa hae holima lefatše, ho "Tsoa Babilona! Tsoang mekhatlong!" Moea o Halalelang kajeno, ponahatso ea Moea o Halalelang ke lengeloи leo le lekang ho khutlisetsa batho morao Lentsoeng, hobane Moea o Halalelang o tla nètèfatsa Lentsoe feela. O ke ke oa nètèfatsa sehlomathiso, ha li na bophelo ho tsona. Ke Bophelo. Lemohang, Mongoaha oa Kereke ea Laodisea o ne o Mo latotse, o Mo hanne, 'me ba Mo ntšelitse kantle.

²¹⁹ Lemohang, lengeloи lena ke moromuoа oa ho qetela pele Kreste a fihla khaolong ea 19 ea Tšenolo. Puo ea moromuoа! Haeba re ka elella, eitseha Puo ea hae e tsebahatsoa holima lefatše, eaba ho hlaho Puo e 'ngoe e neheletsanang le eona Leholimöng. Temana ea 4, ha le batla ho e bala. Ho lokile, temana ea 4, khaolo ea 19. Moromuoа enoa ea lefatšeng o ne a lebahane le Molimo hofihlela, eitseha a bua lefatšeng, eaba Molimo o boela a hoeletsa eona ntho eo ho tsoa Leholimöng. Phetolelo ea temana ea 4 ke efe? Ebe e bolelang? Puo ea Molimo e buang le batho ba Hae ba reriloeng-pele, a re, "Tsoang ho eèna!" Hantle feela joalokaha Puo e buile! O hlahletse batho bohle kahare ka mono, hohle ho phatlalla le Babilona. "Tsoang ho eèna, le se tsohe le kenella libe tsa hae," e, monghali, ho tsoa sehlomathiso seo le litumeloana, ho ea Lentsoeng le entsoeng Moea le Bophelo. Amen.

²²⁰ Lemohang, khaolo ea 19 e a latela, "Ka mora tsena." Na le eleletsoe mona khaolong ea 19, "Ka mora tsena"? Shebang ke'ng? Ka mora eng? Ka mora Molaetsa oa "Tsoang ho eèna!" "Ka mora tsena," shebang, "ke mohoo oa bahalaleli ba Monyaluoа, le Monyali 'moho, ba ea Lenyalong la Konyana." Ebe re atametse hakae, moena? Mohoo oa ho qetela ke ofe? Tsoang Babilona!

²²¹ Joale, baena besō, ke ka baka leo ke leng khahlano le ona. O hanana le mangolo. Ha o tsamaee ka molao. O pakiloe o fosahetse. Molimo ha oa kena kahara oona, ha A eso etse, A ke ke a etsa le ka mohla. Joale, ha ke re ha ho batho kahara mekhatlo ena, kereke e ne e bopiloe ka bona. Empa, ha feela u ntse u ituletse kahara tsamaiso eo, u karolo ea eona.

²²² Haeba ke ahile United States, ke Moamerika. Haeba feela ke le moahi kapa setho sa United States ena, ke karolo ea eona. Ha nka ea Jeremane 'me ka hanyetsa lengolo la botho ba ka mona, kapa boahi ba ka, ebe ke nka boahi ba Jeremane, ha ke sa le Moamerika, ke Mojеремане. 'Me ha nka ea Japane, kapa nqa efe, Rashia, ke fetoha moahi oa mono.

²²³ 'Me ha u ihlomathisa le moahi...tsamaiso, 'me u fetoha moahi oa tsamaiso eo, u itšupa seo u leng sona. 'Me matsatsing ana a bofelo, Molimo o biletsha batho kantle ho eona. Bibele e itsalo, "Tsoang ho eëna, le se ke la kenella libe tsa hae, 'me Ke tla le amohela. Le se ke la ama lisila tsa hae, lea bona, 'me Ke tla le amohela. 'Me le tla ba bara le barali ho 'Na, 'me Ke tla ba Molimo oa lōna." Lea bona?

²²⁴ Ka baka leo ke buile khahlano le kereke, e—e loje. Nke ke ka e bitsa kereke. Ho na le Kereke e le 'ngoe feela, ke Kereke ea 'Mele oa Kreste. Empa liloje tsena tse reiloeng "kereke," Bibele ea ka e mpolella e re ke mabitso a nyefolang, kaofela ha tsona, mekhatalo kaofela. Ebe li nyefola eng? Ho *nyefola* ke ho ema "kahlano le ntho," kapa, "ho bua khahlano." Ha Molimo o re "tloo u tsoaloe," 'me ba re "tloo u ngolise." Lea bona? Ha kolobetso ea Moea e fosisoa le ho ja thajana ea bohobe kahara kereke ea Katolike, ho tsukutla matsoho kahara kereke ea Protestanta, le maikutlo kahara kereke ea Pentekosta, sebakeng sa Motho e leng Kreste ea kenang kahare ka moaho oo ohle oa piramide eo re neng re tšoarane le eona tsatsi le leng.

²²⁵ Eketsa tumelo ea hao, ka matla, le joalo-joalo, ntho ena eohle ho Petrose oa Pele, ea 1...Petrose oa Bobeli, kea kholoa, khaolo ea 1, moo ho ekeletsoang tumelong ea hao, lintho tsena tsohle, borapeli, le bohloeki, le khalalelo, le ntho eohle, ebe u tšauuoa ke Moea o Halalelang.

²²⁶ Empa ho joaloka motho eo ba...batho ba itlaleha ba ruile sena athe ha ba na sona, hobane ba rutiloe ka phoso. Bamethodise ba arubetsoa ke maikutlo a hlollang, mehleng eo, le ho reketla nakoana, kapa—kapa ho hobela Moeeng. Mapentekosta a bua ka lipuo, kapa—kapa ba etsa ntho e sisimosang maikutlo. Ke lumela lintho tseo, ruri, empa lintho tseo kantle ho tsena tse ling ha li thusetho.

²²⁷ Joalokaha ke buile tsatsi le leng, ho tšoana le pikoko... kapa nonyana e ntšo ha e leka ho itlhoma masiba a pikoko, kapa letlaka ha le leka ho sebelisa masiba a leeba. A ne a sa mela mono, e itlhommme oona. A lemiloe, ke mokhatlo oa bolumeli. Empa ha Molimo a kenya ntho ka mono, ke ea tlhaho. U inahanelu re, "Maobane ke ngolisitse kerekeng. Nke ke ka hlola ke ea teng, nke ke ka hlola ke noa, nke ke ka etsa *sena*. Ke ingolisitse kerekeng." Lea bona, u leka ho itšunya masiba a pikoko setopong sa hao sa letlaka. Ke hantle. Lea bona? Lea bona? U tlameha ho tsoaloa labobel! U tlameha ho amohela

Kreste. 'Me ha u amohela Kreste, u ke ke ua amohela Kreste ntle le ho amohela Lentsoe la Hae, hobane Ke Lentsoe. 'Me ha u nkile seboleho sa borapeli, 'me u latola ntho Eo, kea ipotsa. Lea bona? 'Me u ka ba setho sa mekhatlo eohle eo u e batlang ua ba le seboleho sa borapeli, 'me u ntse u se na Oona.

²²⁸ Joale, ke lōna bao, metsoalle. Ke eo ntho eohle. Molimo a le hlohonolofatse. Molimo a le thuse. Ha ke bue sena ho fapano. Ke ntse ke itlhalosa. Ana ke matsatsi peo-lihlomo fatše, ha ke tekene setlamo sa khotso le lōna bareri, le ho leka, ke hopola le tlamehile ho tla tekene le 'na; e seng le 'na, empa le Molimo, Lentsoe. Ke hantle. Ke hantle. Ho bua seo Bibebe e se buang, ho Se bua kamoo E Se buang kateng. Hobane Bibebe e itse, "Ekareha e mong a tlosa kapa a ekeletsa ho eona." 'Me ua bona, mokhatlo ha o kahara mangolo, 'me ha u amohela sehlomathiso sa pele u mpe u khutlele morao koana, hobane u se u tšetse moeli hona mono. Ha u ka khutlela tsoalong e ncha, u tla tsamaea kahara Lengolo.

²²⁹ 'Me ha u kena kahara mokhatlo oa bolumeli, ba re, "Kea tseba, ha re lumele *Sena*. Libishopo tsa rōna ka kerekeng ea rōna li ruta hore re e 'ngoe ea likereke tsa khale ka ho fetisisa. Ha re rute...." Ha ke tsotelle seo ba sa se ruteng. Ha Bibebe e se ruta, Moea o Halalelang ka ho uena O tla iphepa ka Lentsoe. Ho sa tsotelloe bohlale ba motho le kamoo a ka lekang ho Le tlosa ka tlhaloso, ba khona ho e suthisa ka tlhaloso. Mobarebare a ka nka Bibebe 'me a u amoha Molimo ka tlhaloso.

²³⁰ Ka baka leo, motho ha a na tokelo ea ho rera Evangel pele a khonne, a tšoana le Moshe, motšeо koana litšeng tse halalelang moo eèna le Molimo ba neng ba eme ba le bang, pele motho a tsoaloa labobel 'me a ema mono sefahleho le sefahleho le Molimo, 'me a tseba. Ha ho mobarebare, ha ho saek'holoji, ha ho tlhaloso, ha ho moithuti lefatšeng ea ka u amohang Eona. U ne u le teng ha e etsahala! E, mongali. U tseba se etsahetseng.

²³¹ Ebe u re, "Ke fumane boiphihlelo ba mofuta oo, eaba moea o theohela holima ka." 'Me haeba u latola Lentsoe ka mokhoa ofe, u fumane moea o fosahetseng. U re, "Ha ke—ke khone ho mamella nyee e kang Ena. Kea tseba, empa kerekeng ea rōna...." Uh-huh, ke moea o phoso oo. Letšoao la boitsebiso ba hao ke lona leo. Kaine, u tšoailoe. E, mongali.

²³² Eva o belaetse Lentsoe le le leng feela le le nyenyane; e seng sohle seo Molimo a se buileng, Lentsoe le le leng feela le le nyenyane, 'me le hlahisitse masetlapelō afe le masispelō, le lefu, le sebe, le lintoa, le ntho efe le efe, lebitla lefe le lefe, amalanse efe le efe e kileng ea letsa phala, kokelo efe le efe e kileng ea aheloa bakuli. Pelaelo ea hae e nyenyane Lentsoeng le le leng le le nyenyane la Molimo, e hlahisitse hona hohle. Eaba o ntšetsoa kantle, athe sena sohle se ne se sa tlameha ho

etsahala. U tla kena joang, u ntse u belaela Lentsoe le le leng la Eona? Ho re, “Kea tseba hore E bolela *Seo*, empa Le...” E bolela *Seo* hantle!

²³³ Joale shebang. Molimo o tlameha ho ahlola lefatše ka ho hong. U ke ke ua ahlola pele u thea molao. Ntho e ’ngoe e tlameha ho ba teng, u tlameha ho tlola se seng pele u ka ahloloa. Lea bona? ’Me hape kahlolo e ke ke ea lula, ka tšoanelo, e sa beeloa kotlo. Joale, lea bona, u ke ke ua hloma molao kahara motse o reng “kotlo ea ho tlola lebone le lefubelu ke didolara tse hlano,” ebe molao o latelang o re “che, a ka lokoloha.” Lea bona, u ke ke ua etsa joalo. Melao e mebeli e ke ke ea hlongoa ka nako e le ’ngoe. ’Me molao o mong feela, Molimo o mong, Buka e ’ngoe, Kreste o mong. Ke phetho. Tumelo e ’ngoe, tšepo e ’ngoe. Ke phetho. Eona ke Bibele, Kreste.

²³⁴ Lemohang joale, tabeng ena, haeba ntho e ka eketsoa ho Sena, e tlameha ho eketsoa ke motho. E ke ke ea feta...

²³⁵ ’Me haeba Molimo a tla ahlola lefatše ka kereke, ho latela polelo ea Katolike, ebe O tla le ahlola ka kereke efe ea Katolike? Ho na le tse ’maloa; e ’ngoe, ea Roma; e ’ngoe, ea Segerike; ’me, oh, mefuta ea tsona e fapane feela. Ebe O tla le ahlola ka kereke efe ea Katolike? Kapa, na ebe O tla le ahlola ka Lutherane? Be, hape, ’me ekaba O tla le ahlola ka Presbeteriene? Lea bona? Ebe O tla etsang? A ke ke a le ahlola ka kereke. O tla le ahlola ka Lentsoe la Hae. Be, hape, ha A eso...

²³⁶ Lea bona, A ke ke a tšoara sehlopha sa batho, ho latela pono ea khaitsei bosiu bo bong, Moea o Halalelang o ile oa tšolohela kahare, eaba O pholletsa hara lebokose leo hantle. Ehlide, ha ho letho le ka bolokang a Hoo. Ke motho ka bomong. O abetsoe ho hloekisa kereke, empa e ke ke ea O boloka. Ha ho mokhatlo o ka O bolokang. Ke phetho. Feel a ke ke ea khona ho etsa hoo. Le kentse ntho efe le efe ka mono, ’me le ke ke la khona. Mokhatlo o ke ke oa khona. Empa ke motho ka bomong ea tšoereng Moea o Halalelang. Joale lemohang.

²³⁷ Haeba Molimo a tla ahlola lefatše ka Lentsoe la Hae, ruri esale A Le babaletse ’me a Le bolokile ka toka. Kapa, ho seng joalo haeba Le tšophahane kahohle, ebe A ka ahlola joang? Lea bona? Eka khona ebe ntho e ’ngoe. ’Me ha A eso re, “Mang le mang, ka kereke.” O itse, “Mang le mang ea tlosang Lentsoe le le leng Mona, kapa a eketsa lentsoe ho Lona, le eëna ho tla tlosoa (kabelo ea hae) Bukeng ea Bophelo.” Ka baka leo, ho ’na, ke Molimo, Lentsoe la Hae le kahlolo. Joale, haeba ke ahlola ’me ke amohela Lentsoe, ’me ke bona hore Kreste o nchoetse, ke moo ke tla kopa Bophelo ba Hae ho kena kahare le ho ntataisa. ’Me haeba Bophelo ba Hae e le Lentsoe, ’me A ngotse Lentsoe, ebe Bophelo ba Hae bo ahile joang ka ho ’na, athe ke ipolela ke na le Moea o Halalelang, ebe ke eketsa sehlomathiso sebakeng sa Lentsoe? E ke ke ea sebetsa feela.

Nka eketsa mokhatlo oa bolumeli joang athe O khahlano le oona, 'me o e pakile, o e supile ka histori, hore nako le nako ha ba bopa mokhatlo oa bolumeli ba shoa, moeeng? Oh, ehlile, ba holisa palo ea litho. Ke hantle. Ba eketsa litho. Empa, moeeng, ha ba tsue tema. Mpontše, mpolelle historing moo kereke le ka mohla e . . . Ka mora ho bopa mokhatlo, e shoeletse hantle hona mono, Moea o Halalelang o ile oa e tlohela. Mehlolo le meeka ha li sa le teng, 'me eaba e tloha hantle e kena tšenyehong.

²³⁸ Likereke tsa rōna tsa Pentekosta li hlahetsoe ke hoo hantle. Li etsisitse 'ma tsona hantle. Qalong, ba ne ba tsoe, e le batho ba hanang mekhatlo ea malumeli. Joale, ba bang ba lōna baena ba mametseng teipi ena, lōna banna ba bang ba holileng, le tseba seo lilemong tse fetileng, tse mashome a mane, lilemo tse fetileng tse mashome a mahlano, hola ba rerisana le lōna ka mokhatlo, le ka be le e bitsitse nyefolo. Empa joale le litho tsa ntho eo le e hopotseng e ne e le nyefolo. Lōna basali le pomang moriri oa lōna 'me le tšasa ferefef sefahlehong sa lōna, 'ma lōna o ne a e thibela, mohalaleli ea lokileng—ea lokileng eo oa khale oa pentekosta. Ho etsahetseng ka lōna? Pauluse o itse, "Le mathile hantle, le sitisitsoe keng?" Lea bona? Morao mono le ne le lokolohile nyeeng eo, empa le ne le batlile ho tšoana le ba bang bohle ba bona.

²³⁹ Samuele o itsalo hantle. Israele e ne e ena le Morena, 'me e ne e le Molimo. 'Me ba itse, "Samuele, u ntse u tsofala. Re beeble morena, re batla ho tšoana le lefatše lohle. Re batla ho tšoana le lichaba tse ling. Re batla morena ea ka re isang ntoeng, re batla morena ea ka loanang lintoa tsa rōna." 'Me polelo eo ea hlabevisa Samuele.

²⁴⁰ O itse, "Na nkile ka le amoha letho? Na nkile ka le nkela chelete? Na nkile ka le kopa pholo kapa letho? Na nkile ka le qela letho?"

Ba re, "Che. Ha u eso re kope letho."

²⁴¹ Kapa ho re, "Na nkile ka le bolella taba ka Lebitso la Morena haese e hlahileng?" Na ho joalo? A re, "Joale le se ke la amohela morena eo, hobane ho lōna e tla ba ke tšenyeho."

²⁴² Joale ke batla ho le botsa taba, Branham Tabernacle. Le mothating oa ho hola le fetola tabernakele e khōlō joale. Nka tšoha ke tsamaea nakoana. Nka ea nqa e 'ngoe. Ho thata ho bolela moo Morena a tla mpiletsa teng; nka tlosoa temeng, nka khutlela tšimong, mohlomong A ka mpiletsa lefeelleng. Ha ke tsebe moo A tla mpiletsa teng hofihlela Jesu a fihla. Ke batla ho le botsa taba. Na nkile ka le qela letho? [Phuthetho e re, "Che."—Mong.] Na nkile ka le qela chelete? ["Che."] Na nkile ka le bolella taba, hara litaba tse likete tseo ke le boleletseng tsona ka Lebitso la Morena, empa, na ha ea ka ea hlaha? ["Amen."] Ha ho le joalo le se ke la ingolisa le mokhatlo. O khahlano le Lentsoe la Molimo. Tsoang ho oona haeba le le kahara oona, 'me le ikhethe le amohele Lentsoe la Morena.

Ha re inamiseng lihlooho tsa rōna.

²⁴³ Molimo o moholo oa baporofeta, Molimo oa Abrahama, Isaaka, le oa Israele, eketsa matla, Morena, ho Molaetsa o khaotsoeng ona o monyenyanne esale o lutse pelōng ea ka nako e telele, ho isoa ho baena besō. Ba bangata ba teng kantle mane, Morena, ba nkutloisisang ka phoso. Ba hopola ke batla ho fapania. Ba nkhopola ke leka ho iketsa tsebanyane. Ba boleletse batho hore ke thetsa batho, haholo holima lihlooho tse kang *kolobetso ea metsi* ka Lebitso la Morena Jesu, le ka *peō ea noha, sehlola se seholo*, le liteipi tse ngata tseo tse tsoileng li sa tšoara letho haese 'Nete e sa tsoakoang. 'Me ke ba botsitse, "Bang ba lōna tloong le mpontše moo ke entseng sebe, kapa moo ke sa kang ka lumela kapa moo ke hlalotseng Lentsoe ka phoso." 'Me ha ho mang ea kileng a tla. Kea U rapela, Ntate, tsebisa banna bana hore ba fosa hora. Ba tla liehisa nako hofihlela e feta, haeba ba sa shebe. E re bona, e mong le e mong . . .

²⁴⁴ Morena, ke kholisehile ka taba ena, pelō ea ka e ka robeha hola Lengolo lena le ne le sa hlaka ho 'na, holima O itse, "Bohle bao Ntate a 'Neileng bona, ba tla tla. Linku tsa Ka li utloa Puo ea Ka." Hape, Morena, kea kholo 'Muso o joalokaha U boletse, ke tseba hore o joalo, ho joaloka monna ea nkileng letlooa a ea letšeng, eaba o lahlela letlooa a hula lintho tsa mefuta eohle. Mono ha fihleloa, ntle le pelaelo, hlapi mofielammila, mono ho le likhulu, liokho tsa metsi, linoha, ntho efe le efe e tšoasitsoeng ke letlooa la Evangelii. Empa qetellong, tsamaong ea nako, koreifishi ea khutlela metsing hape, khulu ea itsamaela, noha ea shesha ea khutlela mokoting oa seretse, joaloka ntja mahlatsenga eona kapa kolobe seretseng sa eona. Empa hlapi ea makhonthe e ne e le teng mono, Morena. 'Me matšeliso a ka ke ana, ke tseba sena, hore le pele letlooa leo le li tšoasa, e ne e le hlapi mohlang oo. Li tsoetsoe, li reriloepele e le hlapi. Ho joalo le ka letlooa la Evangelii le tšoasang kantle litsoseletsong. U tseba ba Hao ka Sebele. Ntho eo ke jereng boikarabelo ba eona, Ntate, ho latela tsebo ea ka, ke ho ema le Lentsoe lena ka 'nete. Ke Uena Ea etsang qeto ea hore mang ke mang. 'Me kea tseba hore joalokaha khulu e ke ke ea fetoha hlapiteraoto, ho joalo le ka monna kapa motho, ea thibaneng litsebe nqa Evangelii, a ke ke a utloisia 'Nete. Hobane Ntate ke eèna ea bonetseng sena pele, 'me U tšepisitse hore bohle bao A U neileng bona ba tla tla.

²⁴⁵ Ntate oa Leholimō, kea U rapela hore mang le mang ea utloang Molaetsa o monyenyanne ona, Leseli leo o reriloeng ka lona, le moeleso o lutseng pelōng ea ka nqa banna ba hesō, e leng batho bao U ba shoetseng. 'Me banna, ba teng kantle mane, Morena, joaloka mahareng a seholpha sa Kore, banna ba makhonthe, ba tsamaisitsoeng ka bohata, ba tšoere senonetso se halalelang letsohong la bona, empa ba ile ba shoa. Khele, ha ba ka ba lumella le senonetso sa mollo ho tsamaea le bona;

mora oa Aarone, Eleazare, o ne a tlamehe ho li ölla. 'Me ba etsa folaga ea aletare ka liketlele tseo, thebe, ho supa, le ho fetoloa sehopotso sa ntho e nyarosang eo, hore Kore o ne a leke ho bopa lemuloana la mokhatlo khahlano le moromuooa oa Molimo. Ho se etsahale joalo ka rōna, Morena. Lumella Moea o Halalelang ho re sireletska kamehla.

²⁴⁶ Rea U leboha, Morena, haele moo kerekana ea rōna, sefikanyana sena se halalehileng. Lilemong tse ngata tse fetileng, lilemong tse batileng ho ba mashome a mararō tse fetileng le ho hong kathoko, keha ke khumame mona kahara letša le tletseng mahola le le mongobo, 'me eaba re U khethela setša sena, motlotloana ona. 'Me kahara tabernakele eo koana sekhutlong ho manehiloe pono. E etsahetse hantle feela. E sa le teng mono. Ba ke ke ba e heletska, Morena, ba mpa feela ba tla....e a tsafala, 'me ba mpa ba tli'l'o e sireletska ka ho haha e 'ngoe holima eona. Molimo, etsa hore Evangeli ena ea gauta e rekotiloeng maqepheng ana mona, E se hhole e tloha kerekaneng ena Kreste a tle a be afihle. Setho sefe le sefe, setho sefe le sefe sa 'Mele oa Kreste, ba kena mona ba etsoa sechaba ka bophara le lefatše bophara, lumella mang le mang oa bona ho amohele Leseli, Evangeli, 'me a tsamaee ho Eona 'me a amohele Kreste.

²⁴⁷ 'Me ebe 'nete hoo Mantsoe a Hae a tlang ho etsahala, "Mesebetsi eo Ke e etsang, le lōna le tla e etsa. Ea utloang Mantsoe a Ka, 'me a lumela ho Ea Nthomileng, o na le Bophelo Bosafeleng." 'Me Bophelo Bosafeleng ha bo kena kahare, ba tsoaloa ho tsoa Holimo, 'me mesebetsi e tsoang ho Molimo e a ipepesa, kaha ke Bophelo bo tšoanang le bo neng bo ahile ka ho Eēna. Bo ke ke ba etsa letho le fapaneng.

²⁴⁸ Ka hona, Ntate, kereke ena e se ke ea tšetleha qetello ea eona ea Bosafeleng holima tšisimoho, holima mokhatlo, holima letho le katlasana ho Kreste ea phelang ka sebele sa Hae kahare ho bona, a ntse a pepesa Lentsoe la Hae le tšepiso ea Hae ka bona. Ho be joalo, ho qala ka ngoana e monyenyanee ea leng mona bosiung bona, ho isa ho motho ea holileng, ba amohele boiphihlelo bona. 'Me monna ofe le ofe kapa mosali, moshanyana kapa ngoanana, ea utloang teipi ena, ho etsahale joalo ka bona, Morena, ba fuoe kutloisiso hore ke mpa ke leka ho ba lemosa le ho ba hlabela mokhosi ho tsoa, hobane hora ena e morao ho feta kamoo re nahananang kateng.

²⁴⁹ 'Me re bona Babilona, 'mè seotsoa, le barali ba bohle ba lihlola ba phuthehang hammoho. Molimo, rea elelloa Lengolo le boletseng hoba mahola a tšimo ea koro a tla tlangoa mangata, pele. 'Me a se a tlanngoe mangata, ba itheile mabitso a nyefolang a sa bapeng le bona ruri, le hona; ha a amane le Kereke; ke liloje, e seng likereke. E 'ngoe feela hara tsona, Ntate, 'me eona ke eo U e shoetseng.

²⁵⁰ 'Me kea rapela Ntate, tsohle re li bona joale li tlangoa ngata ea mollo oa bomo ea athomo kapele, kea rapela, Morena, hore U tle u lumelle koro ho nona ebe boima. Aba sena, Morena. Re ke re hole 'me re chabise Leseli, re tšoane le Jesu, "Ekare ha Ke etse tseo Molimo a li hlokileng ho 'Na ho li etsa, ekabe'ba ha Ke na Bophelo ka ho 'Na. Empa ekareha Molimo o bua 'me o bontša Bophelo ba Hae, ke Bona bo Ipuellang." Aba sena, Morena. Ke nehela Molaetsa ona ho Uena, le hore U tle u O hlokomele, le ho hlahisa mashome a likete, Morena, kapa, bana ba Hao bohole ba reriloeng-pele Evangeling. Ka Jesu Kreste, Eo e leng Lentsoe, ke rapela ka Lebitso la Hae. Amen.

Kea Mo rata, kea Mo rata
Hoba A nthatile pele
O lefeletse poloko ea ka
Fateng sa Kalvari.

²⁵¹ Ke tlil'o botsa potso. Ba bakae letšoeleng le bonoang lena mona, e leng litho tsa kereke e khōlō ena e ntle, kapa ntlu ea batho, ke rialo, nqalong ena ea ho rapela, ba lumelang ka pelō eohle ea lōna, bophelo ba hao bo phethisa tlhoko (uenia) ea Molimo le ea Bibele, 'me u lumela hore, ka ho sheba bophelo ba hao, le ka ho bona kamoo Moea o u tsamaeang ka ho uena, hore bo lumela Lentsoe le leng le le leng kamoo Le ngotsoeng, 'me bo a Le boloka? U a Le lumela na? Molimo a u hlohonolofatse. A ke a baballe Moea oa Hae holima lōna kamehla.

²⁵² Le ho metsoalle ea ka e teiping, ea ka le ka be le bone letšoeleng lena bosiusg bona, kea kholoa liphesente tse mashome a robong tsa batho li ne li phahamisitse matsoho tsona, li re li lumetse 'me ba etse Bibele hloko, (e seng seo kereke e se buang) seo Bibele e se buang, (e seng seo loje e se buang) seo Bibele e se buang, 'me ba bona Bophelo ba Kreste bo halima kahara Eona.

²⁵³ Lea tseba, matsatsing a fetileng pele ba sibolla lighilisi, e—e sefuthi sa gauta se ne se batola gauta ka noto. Le kile la utloa taba eo kea kholoa. Pele e fetisetsoa ho seqhibilisi, ba e batola. 'Me gauta ke matheriale o boima ka ho fetisia, e feta loto ka boima. 'Me nkile ka khoahlapisa nakoana e se kae, 'me u ka kha lehlabathe mahlatsoetsong mane mahoatateng, ebe u hohla lehlabathe ka matsoho a hao, u ntano (whoosh) butšoela ka mokhoa oo, 'me lerôle le ntho efe li tla fefoha, majoe, empa gauta kaha e le boima e itšalla mono. 'Me ha u thonaka gauta eo, e pitikile hara lerôle le le ngata ebile le se le e khomaretse haholo. 'Me haesale le bokellana holima eona mengoaheng ena eohle ea volekano, e hometsoe ke seretse le ke linthro tsohle, tšepe ea paerate 'me ebile e tsoakane le limatheriale tse ling. Mobatoli o ne a qotsa khoabi ena ea gauta 'me a e batole a ntano e phethola, a e batole a e phethole, hofihlela lithole tsohle li tsoile ho eona. 'Me na le tseba kamoo a tsebileng hore lithole tsohle li tsoile ho eona? O ne a bona tšobotsi ea hae e halimisitsoe kahara eona.

²⁵⁴ Le Molimo o sebetsa Kereke joalo. O batola tumeloana efe le efe, mokhatlo ofe le ofe oa bolumeli, sehlomathiso sefe se entsoeng motho, hofihlela A bona Bophelo ba Hae ka Sebele bo hamisitsoe ka ho uena. “Ekare ha Ke sa etse mesebetsi ea Ntate oa Ka, le se ke la lumela ho ’Na.” Lea bona? Haeba taba e reretsoeng Kereke, Bophelo ba Kreste bo sa halime ka uena, u se ke ua ema ka khutso haeba u eso fumane mamello, matla, lintho tsena tsohle, le boitšoaro, le—le lintho, le borapeli, le lerato la boena, le lintho tsena tsohle tse hlokoang ho uena. Ho sa tsotellehe seo u se entseng, ho sa tsotellehe na u hooelelitse hakae, u ingolisitse le likereke tse kae, u itlhomme masiba a makae, u se ke ua e etsa. U emele ntho ea makhonthe, ho tsoa pelōng ea hao, u ka khona ho tšoarela, hofihlela u fumane lerato la boena pelōng ea hao. Leha ba ka hlotha sehlahla sa litelu lephakong le leng, u ka sokolla lerama le leng ka mosa, lea bona, hofihlela melemo eo, ho sa tsotellehe seo ba se buang ho uena.

²⁵⁵ Eneraha ba koahela sefahleho sa Hae ka lesela ’me ba Mo bata hloohong, ha thoe, “Joale, ke boleletsoe ha thoe U Moporofeta.” Joale ba rutla lesela ba le tlosa ho Èèna, ’me e mong oa bona a kokositse molamu, ha thoe, “Ke mang hara rōna ea U batileng? Ak’o porofete u re bolelle, ka mantsoe a mang, ke hona re tla lumela hoba U Moporofeta.” Ha A ka a ahlamisa molomo oa Hae.

²⁵⁶ Ha u utloa moporofeta a hlaha, a tšoere likarabo tsa malepa afe le afe ao le ka a hlahisang, hopola, ha se moporofeta. Kajeno ba tlameha ho tseba eng le eng, mohla u tla opeloa ke leino le mohla o tla jeoa ke mala, le ntho efe le efe, ba u bolella eona eohle. Ha se tlhaho ea Molimo oa rōna eo. Le shebe baporofeta, le shebe Jesu.

²⁵⁷ Le shebe Pauluse, o ne a otle motho ka bofofu, ’me a tlohela setei sa koporo ho mo leleka naheng, “Kea kholoa matla a hae a ho otla ka bofofu a tapile.”

²⁵⁸ Jesu, Ea khonneg ho tsosa bafu, ’me ho thoe lesole la letaho la Mo tšoetse sefahleho, le ho loana le ho k’hoefa le ho rutla telu sefahlehong sa Hae, ’me ba Mo bata hloohong, ba Mo khurumelitse ka sekatana, ha thoe, “Porofeta u re bolelle ea U tlerileng.” A se a ahlamisa molomo oa Hae feels.

²⁵⁹ Le se ke la shebella basebetsi bana ba maselamose. Le mpe le hopole, ba mpa ba bua feela, dolara ea moshaqane e bua feela ka ea mannete e leng teng nqa e ’ngoe. Ha u bona nyee ena ea mokhatlo e hola e atleha, kamoo ho itsoeng “thetso e tla atleha letsohong la hae,” le hopole feela, Kerekana ea Molimo e teng nqa e ’ngoe, e tlatsitsoeng ruri ka Moea o Halalelang, kannete, e ntseng e nyoloha ka lere. U se ke ua sheba mokhatlo o moholo.

²⁶⁰ Kahara Bibele ho buuoa ka kereke efe e khōlō ho feta mongoaha oa kereke ea Efese? Eareha Pauluse a haola mabopong a holimo a Efese, a fihlela kereke ena, kahara eona

e le banna ba leshome le metso e 'meli. Ke hantle. 'Me e le batho ba lokileng bohole, ba hooelelitse ba thabile monyakeng, ba mpa ba eso amohele Moea o Halalelang. Pauluse a re, "Ha le eso amohele Moea o Halalelang ho tloha le lumetse?"

Ba itse, "Khele, ha rea tseba Moea o Halalelang o le teng."

²⁶¹ A re, "Kanthe le kolobelitsoe joang?" Haeba e ne e sa etse phapang, o itseng ho kereke eo mono?

²⁶² Ba itse, "Re kolobelitsoe ke e mong oa banna ba baholo ba kileng ba hata lefatšeng, Johanne Mokolobetsi, ea kolobelitseng Morena oa rōna. Na ebe kolobetso eo ha e a lekana?"

²⁶³ A re, "Che, monghali. U tlameha ho kolobetsoa hape, hobane 'Muso o koaletsoe ntho efe feela esele." 'Me eareha ba utloa hona... Ha thoë, "Johanne o kolobelelitse pako feela, e seng tšoarelo ea libe, a re le lumele ho Ea tlang, ke hore, ho Jesu." 'Me eitseha ba utloa hona, ba kolobetsoa hape ka Lebitso la Jesu Kreste. Ke hantle. Ka nèpo. Ba ile ba latela Lengolo.

²⁶⁴ Lea tseba, khethelong hoseng hona, Moshe o ne a sale moralo oo a o boneng Leholidong morao, eaba o hloma tente ho e bapisa. Mohla Salomone a ne a aha tempele, eëna (o ile a etsang?) a sala moralo oo Moshe, ka tente, a ntse a babaletse Lengolo mocheng.

²⁶⁵ 'Me mohla Molimo a kenang Tempeleng ea Hae ea matsatsi a qetelo, Tempele ena, Moea o Halalelang, "U Ntokiselitse 'mele," Moea o Halalelang o tšolohile ka Letsatsi la Pentekosta, molaetsa e ne e le ona, "Bakang, e mong le e mong oa lōna, le kolobeletsoe ka Lebitso la Jesu Kreste tšoarelong ea libe, 'me le tla nka neo ea Moea o Halalelang. Hobane pallo ena e etselitsoe lōna le bana ba lōna, le ho ba leng hole, bao Morena Molimo oa rōna a tlang ho ba bitsa." Ha u batla ho bitsa moreri oa hao ngaka, Ngaka Simone Petrose o ngotse lengolo la phekolo, phekolo ea Bosafeleng. Ke eona e phekolang bakuli.

²⁶⁶ Ha le lumella borak'hemisi bana ba moshaqane ba lekang, ka mokhatlo oa bolumeli, ho e tlatsa ka mokhoa osele, ke ka baka leo ba fumanang... Lea tseba, haeba u sa ekets e... le eketsa lengolo la phekolo haholo, u ka 'na ua... chefō e ngata haholo, u ka tšoha u bolaea mokuli oa hao. Haeba u sa kenyé e lekaneng kahare, u... chefō e loantsang, ha u sa etse joalo, o ke ke oa thusa mokuli oa hao. Ngaka ea hao e tseba hantle feela ho ngola lengolo la phekolo.

²⁶⁷ 'Me Kreste, Moea o Halalelang, ke Mongoli oa Phekolo, 'me ke Eëna ea Le ngotseng. U se ke ua Le eketsa kapa ua Le fokotsa ho Lona, noa Moriana ka sebopoho sa oona feela. Ke Sehlare sa lipabo tsohle. Molimo a le hlohonolofatse. Lea Mo rata? Amen.

Kea Mo rata, ke...[Sekheo lebateng—Mong.]

Hoba A nthatile pele
Le ho lefella poloko ea ka
Fateng sa Kalvari.

²⁶⁸ Joale re sa se binela ka marameng, joale sokoloha u tsukutle matsoho le moahisane oa hao mono. Oh, le eèna ke mojaki, ea fetang.

Kea Mo rata, kea Mo rata
Hoba A nthatile pele
Le ho lef-...-los.

[Moena Branham o bua le motho e mong—Mong.] Kea u leboha, moena.

Kea Mo rata, kea Mo rata,
Hoba A nthatile pele
Le ho lefella poloko ea ka
Fateng sa Kalvari.

Kea Mo rata (ha re bineng joale), kea Mo rata
Hoba A nthatile pele
Le ho lefella poloko ea ka
Fateng sa Kalvari.

²⁶⁹ Joale ha re inamiseng lihlooho tsa rōna, re koale mahlo a rōna, re phahamisetse matsoho a rōna le mantsoe a rōna ho Molimo joale, ke sa le neeletsa molisa. Re thabetse ho ba le lōna mona. Ha re mokhatlo oa bolumeli. Ha re na molao ntle le lerato, ha ho tumeloana ntle le Kreste, ha ho buka ntle le Bibele. Ha re ngolise batho; empa ke botsoalle ka Mali a Jesu Kreste a re hloekisang ho se lumele hohle.

²⁷⁰ Ho lokile, 'moho joale. “Ke...ke...” Molimo a le hlohonolofatse. Le khutle le re etele hape.

Hoba A nthatile...

Ho lokile, molisa, moena. Morena a be... Molimo a u hlohonolofatse. “Me...”



HOBANENG KE LE KHAHLANO
LE BORAPELI BO HLOPHILOENG SST62-1111e
(Why I'm Against Organized Religion)

Molaetsa wona, ka Moena William Marrion Branham, o rerilwe sethatong ka Senyesemane mantsiboya a Sontaha, Pudungwana 11, 1962, Tabernakeleng ya Branham e Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org